

ARRÜNA ÑACONOMOSORRTI SAN PABLO ÜMO BAMA ROMANOS

Ñaquioncorrti Pablo ümo bama au Roma

1 ¹Arrüñü Pablo rraconomoca tanu aume bama icocoromati Tuparrü au Roma. Arrüñü yaserebiquia ümoti Jesucristo. Arrti Bae Tuparrü itasurutiñü, nauqui apóstol ñü ümoti. Icüpurutiñü nauqui suraboi arrüna urriampae manitacarrü, arrüna uiche utaesübu eanaqui nomünantü. Isamomecaca uiti ümo arrüna trabacorrü.

²Arrüna urriampae manitacarrü tucoboi ensümunu tücañe uiti Tuparrü icu Nicororrü turuqui bama nesarrti profetarri. ³Arrümanu manitacarrü ta icütüpüti Jesucristo. Nantü que tonenti naqui Aütorrti Tuparrü y Señorti oemo. Anati icu cürrü eanaqui nesarrti familiarrü David. ⁴Arrtiatoe Bae Tuparrü itusiancatati usucarü que tonenti Aütorrti, naqui chücupiusupü nüriacarrti, numo isümoniancanatiti tato eanaqui macoiñoca. Sane nauquiche caüma tonenti Señor oemo. ⁵Ui nipucürurrti ichacuñü itasurutiñü nauqui apóstol ñü ümoti (coreorrü), nauqui suraboi arrüna urriampae manitacarrü isucarü namanaiña macrirrtianuca icu na cürrü, nauqui oncomatü ümoti y aicocoromati. ⁶Arraño ito abaca eana bama tacümanauncunu uiti Tuparrü, nauqui pertenecebo año ümoti Jesucristo.

⁷Sane nauquiche rraconomoca tanu aume, bama abaca au manu pueblurrü Roma. Aucuasürüca ümoti Tuparrü. Autacümanauncuca uiti nauqui pertenecebo año ümoti. Tari icunusüancanati año y taiquiana urria nabaca uiti Bae Tuparrü y uiti Jesucristo, naqui Señor.

Rranrrti Pablo apaseati au Roma

⁸Suraboirra primero niñachampienca ümoti Tuparrü au nürirrti Señor Jesucristo autacu, itopiqui au nanaiñantai icu na cürrü tusio arrüna apicococati nurria Tuparrü. ⁹Nantarrtai arrtü rreanca rraqioncañü abapa. Arrti Tuparrü



Salutación (Ro. 1.1)

tusio nurria ümoti que ñemanauntu arrüna sane. Yaserebiquia ümoti aübu nanaiña nisüboriqui, y surapoi arrüna manitacarrü icütüpüti naqui Aütorrti. ¹⁰Rranquiquia ito pünanaquiti, nauqui puerurrü yero tanu yapasearaño, y nauqui urria niyapaseaca. ¹¹Irranca te yasaraño, nauqui suraboi ausucarü arrüna torrio iñemo uiti Espíritu Santo. Sane nauqui ane manrrü narucurrü aume. ¹²Abu irranca ito nauqui apayura iñemo, tacana arrüñü aume. Sane nauqui ane nubayuraca oemomantoe, nauqui manrrü oñoncatü ümoti Cristo.

¹³Suraboi ausucarü bama masaruquitaqui au nürirrti Jesús: Tücoi nirranca yasaraño, pero hasta caümainqui chüpuerurrüpi yero tanu. Irranca suraboi nurarrti Tuparrü tanu au Roma, nauqui aboma bama icocota, tacana arrüna pasabo sobi au piquiataca narücüquiquia ümo bama maquiataca chütüpü israelitarrü. ¹⁴Ta sane yacüpucurrü Tuparrü iñemo, nauqui suraboi isucarü namanaiña, isucarü bama marraraca, isucarü bama ito masauca. Tiene que suraboi isucarü bama amoncoma au nirrcuera, y isucarü ito bama champü manunecarrü ümoma. ¹⁵Sane nauquiche irrancatai suraboi arrüna urriampae manitacarrü ausucarü bama pohoso au Roma.

Nüriaca nurarrti Tuparrü

¹⁶Chisüsocapü aübu na manitacarrü icütüpüti Jesucristo, itopiqui tusio nicusüurrü Tuparrü uirri, y uirri taesüburuma eanaqui nomünantü namanaiña macrirrtianuca, primero arrübama israelitarrü, y auqui ito bama chütüpü israelitarrü, arrtü icocotama. ¹⁷Ui arrüna urriampae

manitacarrü tusio oemo causane nauqui urria nusaca au narrtarrü Tuparrü. Nauqui urria, tiene que oñoncatü nurria ümoti, itopiqui sane nantü icu Nicororrü: “Artri naqui urria nacarrti au narrtarrti Tuparrü, es ui arrüna oncotitü ümoti. Uiti te Tuparrü torrio isüboriquiboti”.

Nipüenate bama macrirrtianuca

¹⁸Tusio oemo que artri Bae Tuparrü auqui napese bacipuruti carrticurrü fuerte ümo namanaña bama chiñanaunumatipü y isamutema aruqui nanaiñantai nomünantü, bama chirranrripü oncoimía arrüna ñemanauncurratoe manitacarrü. ¹⁹Abu arrüma tusio ümoma nacarrti Tuparrü, itopiqui arrtiatoe itusiancatati isucarüma. ²⁰Chüpuerrüüpüma asaramati, pero puerurrüma aisuputaramati isiqui nanaiña arrüba omirriante uiti. Nanaiña arrtaimia. Uirri tusio arrüna champü tacanache nicusiurrti, y tusio ito ümoma que artri Tuparrti. Sane nauquiche champü isane urapoboiboma; ane nipünatema. ²¹Así que arrübama macrirrtianuca icu na cürrü isuputaramati Tuparrü, pero chiñanaunumatipü, ni achampienapüma ümoti. Churriampü ñapensacarrüma. Sane nauquiche tacanarrtü aboma au tomiquianene. ²²Arrüma caüma ñaquioncorrüma tarucu ñapanauncurrüma, abu champü. Tomema bama manrrü sonsorrüma. ²³Oncono uimía ñanauncurrüma ümoti Tuparrü, naqui champü nitacüru nisüboriquirrti. Manaunuma ümo bama masantuca, bama urriancamantai aruqui nanaiñantai nacarrüma, tacana mañoñünca, nutaumanca, numuquianca, noirrobo. ²⁴Sane nauquiche onconoma uiti Tuparrü, nauqui aisamunema isiu nirrancarrüma. Uirri caüma isamutema arrüna churriampü aübumantoe arrüna uiche acüsoma. ²⁵Champürrtü icocoromati naqui ñemanauncurratoe Tuparrü, sino que ta icocotama arrüna mapancarrü. Manaunuma ñoma ba omirriante uiti Tuparrü, tapü ümoti chümanaunupüma. Abu tonenti naqui ñemanauncurratoe Tuparrü. Tapü tacürusu numanauncu ümoti. Amén.

²⁶Sane nauquiche chebatai uiti Tuparrü nauqui aisamunema isiu nirrancarrüma arrüna nomünantü aübumantoe, arrüna uiche ane cüsocorrü. Paüca murrianrrü ñomeampatoe, chümurrianrrüquipü ümo mañoñünca. ²⁷Isiu ito isamutema mañoñünca. Oncono uimía nirrancarrüma ümo paürrü. Rranrrüma ümoti quiatarrü, arrüna uiche acüsoma. Sane nauquiche artri Tuparrü bacheboti carrticurrü ümoma itopiqui arrüna churriampatai yachücoimía aübumantoe.

²⁸Arrüma chaquionopümacü iyoti Tuparrü. Uirri caüma chebatai uiti nauqui aisamunema isiu arrüna churriampatai ñapensacarrüma. Sane isamutema caüma. ²⁹Ane aruqui nanaiñantai nomünantü uimía. Rranrrüma ümo nanaiñantai. Ubatioma arrüna nane ümoti quiatarrü. Malorrüma. Batabayoma. Bahiyoma. Matachemacanama. Ñatama metorrü ümoti quiatarrü. Encañaoma ümoti quiatarrü. Manitanama churriampü apüti quiatarrü. ³⁰Tüboricomantai ümoti Tuparrü. Vanurrüma, ñaquioncorrüma champüti quiatarrü pürücüma. Tabüco uimía nomünantü yachücoboiboma. Chümacoconaurripüma ümo bama yaütorrüma y nipiäcutorrüma. ³¹Chütusiopü ümoma isane urria, isane

churriampü. Chücoconopü uimia nurarrüma. Chücuasürütipü quiatarrü ümoma. Chipiacapüma apucüruma itacuti quiatarrü. ³²Arrüma tusio nurria ümoma arrüna urria au narrtarrti Tuparrü. Tusio ümoma que arrübama sane nisüboriqirrimia tiene que acoma ui carrticurrü. Pero nisanempü aicoñocomo nisüboriqirrimia. Más bien urriantai ümoma arrtü aboma bama isamutema isiu arrüna churriampatai yachücoimia.

Arrüna ñimanauncurratoe yacurrtacarrti Tuparrü

2 ¹Supi arrtü arrücü uracati quiatarrü. Pero ta champü marrimiacatarrü aemo, itopiqui isiatat arrüna nomünantü obi tacana uiti. ²Nëmanauntu te, arrti Tuparrü bacheboti carrticurrü ümo bama churriampü yachücoimia, y arrümanu carrticurrü ta ñëmanauncurratoe. ³¿Causanempü arria acurrtat aübu bama maquiataca, abu isiatat arrüna aisamye? ¿Causane apensa que puerurrü ataesübu ñünana carrticurrü? ⁴¿Taqui champü nümoche obi nibuenucurrti Tuparrü aübüci, naqui tarucu nacua ümoti? Uirri te chücontopü acheti carrticurrü aemo. Rranrti nauqui puerurrü aiñoco arrüba nomünantü obi, y nauqui aiñorronconü. ⁵Pero arrücü charriancapü acampia nasüboriqui, ni aiñorronconüpito. Sane nauquichi aumentabo manrrü arrüna nomünantü obi, hasta manu nanenese anche ñana acurrtati Tuparrü aübu manu ñëmanauncurratoe carrticurrü.

⁶Au manu nanenese bacheboti ümo bama macrirrtianuca isiu arrüna yachücoimia auna icu na cürrü. ⁷Arrübama chübatachebopüma ñasamucurrüma arrüna urria ui nirrancarrüma aye uimia au napese au nanentacarrti Tuparrü, tonema bama yasutiuma isüboriquiboma arrüna champü nitacürurrü. ⁸Tapü arrübama mapensarama ümomantai, chirranrrüpüma ümo arrüna urria, chebo uimia ümo nomünantü, tonema bama yasutiu yarusürürrü carrticurrü uiti Tuparrü. ⁹Artri bacheboti itaquisürücüboma y irrucubuma bama isamytéma nomünantü. Bacheboti ümo bama israelitarrü, y ümo bama ito maquiataca.

¹⁰Tapü arrübama isamutema arrüna urria, arrti Tuparrü bacheboti isüboriquiboma au napese au nanentacarrti. Acamanu urria nacarrüma, cuasürüma. Champü nümoche arrtü israelitarrüma o chütüpü israelitarrü.

¹¹Itopiqui ümoti Tuparrü chepatai naca macrirrtianuca. ¹²Aboma te arrübama chisuputacaipüma nüriacarrü uiti Tuparrü. Pero arrtü isamutema nomünantü cuatü carrticurrü ümoma, abu champürrtü ui nüriacarrü. Tapü arrübama isuputacaimia nüriacarrü, arrtü ane nomünantü uimia, carrticaboma ito, itopiqui sane nantü nüriacarrü. ¹³Itopiqui chücunauntañampatai tiene que oñonsaperio nüriacarrü, sino tiene que uicoco ito nanaiña, nauqui urria nusaca au narrtarrti Tuparrü. ¹⁴Arrübama chütüpü israelitarrü chisuputacaipüma nüriacarrü, arrüna torrio uiti Tuparrü. Pero aboma bama eanama isamutema tacana yacüpucu nüriacarrü. Ui arrüna sane tusio, que arrüma tusio ümoma arrüna urria, abu champürrtü tüleheboma Nicororrrü nesa nüriacarrü. ¹⁵Arrüna nüriacarrü ane tacanarrtü corobo au nausasürüma uiti Tuparrü. Sane

nauquiche tusiatai ümoma arrüna yacüpucurrüti. Arrtü chücoconopü uimia onquisioma arrüna nipiñatema. Arrtü cocono uimia tusiatai ümoma. ¹⁶Cuatü ñana manu nanenese anche bacüpuruti Tuparrü ümoti Jesús na acurratati usaübu ümo nanaiña numapensaca auqui nutusi, arrüba abe umanecanatai. Auqui caüma tusio nanaiña. Tone arrüna isurapoi isucarü macirrtianuca.

Arrübama israelitarrü ichepe nüriacarrü

¹⁷Arraño bama israelitarrü aupucünuncatai, itopiqui israelitarrü año, y apisuputacai nüriacarrü uiti Tuparrü. Napaquionco urria nabaca, itopiqui pertenecebo año ümoti. ¹⁸Tusio aume nirrancarrüti. Uiqui nüriacarrü tusio aumi arrüna urria uisamune y arrüna churriampü. ¹⁹Napaquionco puerurrü apiñununecanama bama chisuputaramatipü Tuparrü tacana basarurrü año ümo bama aboma au tomiquianene, bama chütüpü israelitarrü. ²⁰Apiñununecacama ito bama chütusiopü ümoma. Aburapoi isucarü bama champüatai ñapanauncurrüma arrüna yachücoboiboma. Itopiqui napaquionco apisuputacai nanaiña arrüba ñimanauncurratoe nomirria icuqui manu nüriacarrü ane corobo. ²¹Mañapanca año. Apanunecaca ümo maquiataca. ¿Causanempü chapanunecacapü aumeampatoe? Arraño apanunecaca ümoti quiatarrü, tapü cusüpioti. Pero sane ito arraño, tapü apacusüpüca. ²²Amucanaño ümoti quiatarrü tapü bavivicoti tacana numuqianca. Pero arraño ito tapü apaviviquia tacana numyqianca. Apuncama bama sürümana nituparrüma y nisanturrüma, pero arraño aucusüpüca auqui nipo manuma ituparrüma. ²³Arraño bama israelitarrü tarucu nauvanucu, itopiqui torrio aume nüriacarrü uiti Tuparrü. Pero chücumplibopü año aübu. Ui arrüna sane apacünsomococa ümotio Tuparrü. ²⁴Nantito icu Nicororrü: “Arrübama chütüpü israelitarrü manitanama churriampü ümoti Tuparrü auqui nabaca, bama israelitarrü”. Itopiqui churriampü napachücoi isucarüma.

²⁵Arraño circuncidabo año na atusi que ta israelitarrü año. Urria manu circuncisión, arrtü apicocota nurria nüriacarrü. Tapürrtü chapicocotapü, champü yaserebiquirri aume manu circuncisión. Abaca au narrtarri Tuparrü tacanati naqui chütüpü israelitarrü. ²⁶Tapü arrti naqui chücircuncidabopü pero arrtü isamutenti isiu arrüna yacüpucu nüriacarrü, anati caüma au narrtarri Tuparrü tacanti naqui circuncidabo. ²⁷Sane nauquiche arrübama champürrtü circuncidaboma pero icocotama nüriacarrü, uraboma año ñana isucarüti Tuparrü, itopiqui arraño circuncidabo año y tusio aume nüriacarrü, pero chapisamutempü isiu. ²⁸¿Causane caüma osoi nauqui ñimanauncurratoe israelitarrü oñü o sea nauqui asyriuruti oñü Tuparrü? ¿Taqui ui arrüna usaca icu cürü ayqui familiarrü israelitarrü o ui arrüna arrtü circuncidabo oñü? No, champü. ²⁹Arrtü urrianca ñimanauncurratoe israelitarrü oñü, tiene que uicoñoco numapensaca churriampü ane au nuyausasü. Tone caüma arrüna ñimanauncurratoe circuncisión oemo. Auqui caüma urria ñaquiuncorrti Tuparrü oemo, champürrtü ñaquiuncorrti macirrtianucatai.

3 ¹Sane nauquiche sucanañü: ¿Isane niyaserebiquirri oemo, arrtü israelitarrü oñü, o arrtü circuncidabo oñü? ²Ñemanauncurratoe anen te niyaserebiquirri, itopiqui ümo bama israelitarrü tücañe torrio nurarrti Tuparrü. ³Aboma bama eanama chicocotapüma tücañe, pero arrti Tuparrü chüpuerurrüpü atacüru nibuenucurrti uirri. ⁴Arrti nantarrai cumpliboti nurria aübu nurarrti, champü nümoche arrtü namanaiña macirrtianuca icu na cürrü mañapancama. Nantü icu Nicororrü sane:

Arrücü Tuparrü arrtü anitaca tusiatai que ñemanauncurratoe.

Arrtü rranrrüma urabomacü, tütusio, ta champürrtü ñapanrrücü.

⁵Sane nauquiche aboma caüma bama namatü: “Canapae manrrü tusio nibuenucurrti Tuparrü, arrtü uisamute nomünantü. Arrtü sane, ¿causane acheti carrticurrrü oemo?” Sane nura genterrü. ⁶Suraboira arrüna sane: Tapü apapensaca sane. Itopiqui arrtü nampü churriampü uiti Tuparrü, quiubupito puerurrtipü acurrtatai ñana aübu bama macirrtianuca icu na cürrü.

⁷Chauqui tisurapoi que aboma bama namatü sane: “Canapae urriantai arrüna nirrapantu, itopiqui uirri manrrü tusio que i ñemanauntu nurarrti Tuparrü y ane manrrü manauncurrrü ümoti uirri. Sane nauquiche chüpuerurrüpü acheti carrticurrrü iñemo itopiqui arrüna nomünantü sobi”.

⁸Aboma ito bama namatü: “Masamuna arrüna churriampü, nauqui basarai arrüna urria”. Hasta namatü que sane ito nirranunecaca, abu chüsanempü. Urriantai acheti Tuparrü carrticurrrü ümo bama sane nurarrüma.

Nanaiña oñü ane nuipüenate

⁹¿Isane caüma surapoboibo? ¿Aensapü manrrü buenurrüma bama israelitarrü pünanaqui bama maquiataca? No, chüsanempü. Chauqui túsucanañü que arrübama israelitarrü ane nomünantü uimia isiatai tacana bama maquiataca. ¹⁰Ta nantü sane icu Niororrü:

Champüti naqui urria nisüboriquirrti icu na cürrü.

¹¹Champüti naqui iyebo uiti nurarrti Tuparrü, y champüti naqui ñemanauncurratoe yapacheriurutiti.

¹²Namanaiña iñoconomati.

Champü isane niyaserebiquirrimia.

Champüti naqui isamute arrüna urria, namanaiña isamutema arrüna churriampü.

¹³Churriampü ñanitacarrüma, tacana arrone cajón aurübo arrüna cauta anati coiño.

Tacana pichananene ñanitacarrüma ui arrüna tarucapae ñapanturrüma.

¹⁴Pururrü mapaurramacarrü arrüna nurarrüma.

¹⁵Contoatai itabairomati quiatarrü.

¹⁶Au nanaiñantai arrüna cauta süromatü taquisürüma bama maquiataca uimia, y nanaiña iñarrio uimia arrüna urria.

¹⁷Chipiacapüma arrüna nomirria aübuti quiatarrü.

¹⁸Chaquionomacü iyoti Tuparrü.

¹⁹Tusio te oemo que arrüna nüriacarrü antiburrü uiti Tuparrü valeo ümo nanaiña bama ümoche atorri, bama israelitarrü. Sane nauquiche arrüma ito champü isane urapoboiboma isucarüti Tuparrü. Namanaiña macrirrtianuca icu na cürrü ane nipünatema. ²⁰Sane nauquiche suraboira sane: Chüpuerrüüpü nauqui urria nusaca au narrtarrti Tuparrü ui numacoconauncu ümo manu nüriacarrü. Ui nüriacarrü cunauntaña tusio oemo que ane nomünantü osoi.

**Urria nusaca arrtü oñoncatü
ümoti Cristo**

²¹Pero caüma arrti Bae Tuparrü itusiancatati usucarü causane nauqui urria nusaca au narrtarrti. Champürrtü ui numacoconauncu ümo nüriacarrü. Pero tucoboi ane corobo auqui nüriacarrü arrüna nuevurrü cutubiurrü ümoti Tuparrü, y arrübama ito profetarrü turapoimiatücaü. ²²Nauqui urria nusaca au narrtarrti Tuparrü tiene que oñoncatü ümoti Jesucristo. Arrüna manunecatarrü valeo ümo namanaiña macrirrtianuca, itopiqui chepatai nacarrüma ümoti Tuparrü. ²³Namanaiña macrirrtianuca icu na cürrü ane nipünatema. Sane nauquiche champüti naqui urria nacarrti au narrtarrti Tuparrü tacana numo maübo asamuti genterrü isiu tacana nacarrti. ²⁴Pero arrti pucürusuti utacu, y yasuriuruti oñü tato. Uiti Jesucristo utaesübuca tato eanaqui nomünantü. Tone ñacumanatarrti Tuparrü oemo. Chüpuerrüüpü bapaca itobo.

²⁵Arrti Jesucristo ensümunuti tücañe uiti Tuparrü, nauqui aconti itopiqui arrüna nomünantü osoi. Ui notorrti caüma puerurrü aurrimiaca tato nomünantü osoi aübuti Tuparrü, arrtü oñoncatü nurria ümoti. Sane caüma tusio oemo que ta urriantai ñapensacarrti Tuparrü usaübu auqui maübo. Tücañe champürrtü carrticabo genterrü uiti, itopiqui barrüperaratiqui ñome ba naneneca anche morrimiacana tato uiti Jesucristo nomünantü uimia. ²⁶Sane te, au ba naneneca tusio oemo que urriantai nanaiña arrüna ñapensacarrti usaübu. Urria ito caüma au narrtarrti naca bama oncomatü ümoti Jesús.

²⁷Sane nauquiche champü isane itopiquiche uvanu, itopiqui arrti Tuparrü yasuriuruti oñü champürrtü ui arrüna urria uisamute, ta ui arrüna arrtü oñoncatü ümoti Jesucristo. ²⁸Sane nauquiche tütusio nurria oemo, chüpuerrüüpü urrian tato nusaca au narrtarrti Tuparrü ui arrüna uisamute isiu nüriacarrü. Yasuriuruti oñü saneantai ui arrüna arrtü oñoncatü ümoti Jesucristo. ²⁹Arrti Tuparrü tonenti te Tuparrü ümo namanaiña macrirrtianuca icu na cürrü, champürrtü ümo bamantai israelitarrü. ³⁰Anati tamantiatai Tuparrü ümo bama israelitarrü bama circuncidabo, y ümo bama ito chütüpi israelitarrü. Yasuriuruti oñü namanaiña, arrtü oñoncatü nurria ümoti Jesucristo. Chepatai nucua ümoti.

³¹¿Acasopü ui arrüna uicococati Jesús chiüvaleoquipü arrüna nüriacarrü? Chüsanempü, valeatai. Más bien ui arrüna numacoconauncu ümoti Jesús tusio arrüna ñemanauncurratoe nicua nüriacarrü.

Arrüna yachücoiti tücañe Abraham

4 ¹Mapensariora iyo nisüboriquirrti Abraham tücañe. ²¿Causane arrüna nauquiche urria nacarrti au narrrarrti Tuparrü? ¿Aensapü ui arrüna urria isamutenti? Arrtü sanempü, anempü itopiquiche nauqui vanurrti isucarüti Tuparrü. Abu champü. ³Ta nantü icu Nicororrü sane: “Arrti Abraham icocotati nurarrti Tuparrü y oncotitü ümoti. Sane nauquiche urria nacarrti au narrrarrti Tuparrü. ⁴Tacanarrtü ümoti naqui batrabacara torrio ümoti monirri itobo yatrabacacarrti. Arrümanu monirri chütüpü macumanatarrrü ümoti, ta bapacatarrrü ümoti itobo yatrabacacarrti. ⁵Pero uiti Tuparrü chüsanempü. Oecatü uiti esati champürttö itopiqui arrüna urria uisamute, ta itopiqui arrüna tusio oemo que arrti yasuriurutiti naqui ane nipünatenti, pero arrtü oncotitü ümoti, morrimiacana tato nomünantü uiti. ⁶Arrito David tücañe urapoiti nipucünuncurrüma bama urria nacarrüma au narrrarrti Tuparrü, champü nümoche uiti arrüna yachücoimia tücañe. Ane corobo uiti sane:

⁷Urriampae naca bama morrimiacana tato nomünantü uimia, tacürusu nipünatema.

⁸Tarucapae nipucünuncurrüma, itopiqui morrimiacana tato nomünantü uimia, y arrti Tuparrü chanantopü aquionotiyü tato yubapa.

⁹¿Taqui ane arrüna macunusüancacarrü ümo bamantai circuncidabo, o ane ito ümo bama maquiataca? Bueno, chauqui tüsucanañü que arrti Abraham urria nacarrti au narrrarrti Tuparrü itopiqui icocotati nurarrti y oncotitü ümoti. ¹⁰Au manu tiemporrü tücañe nauquiche yasuriurutiti Tuparrü, arrti Abraham chücircuncidabotiquipü. ¹¹Primero icocotati nurarrti Tuparrü y oncotitü ümoti. Sane nauquiche urria nacarrti au narrrarrti Tuparrü. Auqui caüma circuncidaboti tacana señarrü apüti, na atusi, ta tonenti naqui oncotitü ümoti Tuparrü, y chauqui turria nacarrti. Sane nauquiche cusürüböti Abraham aübu namanaiña bama champürttö circuncidaboma, abu icocotama nurarrti Tuparrü. Itopiqui arrüma ito caüma urria nacarrüma au narrrarrti Tuparrü. ¹²Ñemanauntu te arrübama israelitarrrü circuncidabo, aboma auqui nesarrti familiarrü Abraham. Pero champürttö namanaiña israelitarrrü urria nacarrüma au narrrarrti Tuparrü. Ta arrübamantai icocota nurarrti y oncomatü ümoti tacanati Abraham tücañe, numo chücircuncidabotiquipü.

Oñoncatü ümoti Tuparrü

¹³Artri Tuparrü urapoiti isucarüti Abraham que rranrri aitorrimiyati nanaiña cüca ümo bama eanaqui nesarrti familiarrü ñana, nauqui üriaburuma ñome. Sane nurarrti ümoti, champürttö itopiqui arrüna isamutenti isiu nüriacarrü, ta itopiqui arrüna oncotitü ümoti. ¹⁴Arttö nampü ui nüriacarrü urria nusaca ümoti Tuparrü, entonces champü nümochequi oñoncatü ümoti. Ümonataipü arrümanu nurarrti tücañe ümoti Abraham. ¹⁵Itopiqui auqui naca nüriacarrü

cuatü carrticurrü oemo, itopiqui nantarrtai uisamute arrüna churriampü. Arrtü champü nüriacarrü, chüpuerurrüpto atusi arrtü ane nuipüinate.

¹⁶Sane nauquiche arrümanu nurarrti Tuparrü ümoti Abraham tücañe valeo caüma ümo bama oncomatü ümoti. Arrüna rranrti aitorrimia oemo, ta macumanatarrrü ui nibuenucurrti. Sane caüma cocono manu nurarrti ümo namanaiña bama aütorrti Abraham. ¿Ñacubama ñëmanauncurratoe aütorrti Abraham? ¿Aensapü arrübamantai israelitarrrü, bama isuputacaimia nüriacarrü? No, champürrtü arrümantai, ta namanaiña bama ito oncomatü ümoti Tuparrü tacanati Abraham tücañe. Tonema bama ñëmanauncurratoe aütorrti Tuparrü.

¹⁷Sane ito ane corobo nurarrti Tuparrü ümoti Abraham: “Ui bama aütaiqui abe ñana sürümana nacioneca”. Sane caüma arrti Abraham tonenti uyaü au narrrarrrti Tuparrü, itopiqui icocotati nurarrrti Tuparrü, naqui bacheboti isüboriquibo bama tücoiño, naquito ipiaca aisamunenti arrüna champü tütane.

¹⁸Arrti Tuparrü nantü ümoti Abraham: “Tiene que anati tamanti ahü, y uiti caüma tarucapae nubiqui bama naesa familiarrü ñana, sane nauqui omirriane uimia sürümana nacioneca”. Auqui arrti Abraham icocotati nurarrrti Tuparrü. Barrüperarati nauqui acoco, abu arrti chauqui tüpomati. Chüpuerurrüptü aübositiqüi. ¹⁹Tüsai ane cien añoca ümoti, y tusio ito ümoti ta tüpoma nicüpostoti. Isiatai chüpuerurrüptü aübosi. Pero arrti icocotatiatai manu nurarrrti Tuparrü. Champü penarrü uiti. ²⁰Champü quiatarrrü ñapensacarrrti. Manrrü oncotitü ümoti Tuparrü. Uirri cusüuruti tato y iñanaunutiti Tuparrü. ²¹Tusio te ümoti que arrti Tuparrü ane nüriacarrrti nauqui aisamunenti isiu nurarrrti. ²²Sane nauquiche urria nacarrrti Abraham au narrrarrrti Tuparrü tacana arrüna ane corobo.

²³Arrümanu nantü sane icu Nicororrrü champürrtü ümotiatai Abraham, ta oemo ito. ²⁴Urria ito nusaca au narrrarrrti Tuparrü, arrtü oñoncatü nurria ümoti naqui uiche isümoniancanatiti Señor Jesucristo eanaqui macoiño. ²⁵Chebatai uiti na aconti Jesús, nauqui puerurrü aurrimiaa tato nomünantü osoi. Pero auqui isümoniancanatiti tato, sane nauqui urria nusaca au narrrarrrti.

Urria nusaca aübuti Tuparrü

5 ¹Sane caüma urriantai nusaca au narrrarrrti Tuparrü, itopiqui uicocota nurarrrti. Caüma urria ñaquiñcorrrti oemo, chapie ümoti Señor Jesucristo. ²Ta uiti Jesucristo usaca caüma au nigraciarrti Tuparrü, itopiqui oñoncatü ümoti. Tarucu nupucünuncu, itopiqui tusio oemo, iyebo ñana osoi au napese au nanentacarrrti Tuparrü. ³Upucünunca ito icuata nutaquisürücü auna icu na cürrü, itopiqui uirri uipiaca masamu tairri. ⁴Uirri caüma enterurrü nosüboriqui manrrü urria, y manrrü nubarrüperaca ñome ba omirria ñana. ⁵Sane ito tusio nurria oemo que champü isane pasabo oemo, arrtü bacurrtarati Tuparrü ñana. Itopiqui arrti chauqui titorrimianatiti Espíritu Santo oemo. Uiti Espíritu Santo oñonquisio nurria au nuyausasü arrüna tarucu nucua ümoti Tuparrü.

⁶Tücañe chuipiacapü uisamune arrüna urria. Sane nauquiche arrti Cristo coiñoti yotopiqui ba tarucu nomünantü osoi au manu tiemporrü ensümunu uiti

Tuparrü. ⁷¿Taqi anati naqui rranrrü aconti itoboti quiatarrrü naqui champü nipünatenti? Rrepente tabücoti taman naqui rranrrü aconti itoboti quiatarrrü, naqui tarucu nibuenucurrti. ⁸Pero arrti Cristo coiñoti otopiqui numo aninquí tarucapae nomünantü osoi. Uirri tusio arrüna tarucu nucua ümoti Tuparrü. ⁹Chauqui turria nusaca au narrrarrrti Tuparrü ui niconcorrti Jesús. Sane nauquiche tusio nurria oemo que itaesümunuti oñü nünana carrticurrrü, arrüna cuabotiqui ümo bama icu na cürü. ¹⁰Tücañe enemigorrü oñü ümoti Tuparrü. Pero arrti irrimiacatati tato usaübu ui niconcorrti Aütorrti. Pero süboricoti tato. Uirri caüma segururrrü urria nusaca ñana. ¹¹Caüma ito ane upucünuncubu, itopiqui chauqui tiyebo oemo nauqui amigorrü oñü ümoti Tuparrü. Arrüna sane pasabo uiti Jesucristo, naqui Señor. Uiti ane marrimiacatarrrü aübuti Tuparrü.

Artri Adán y artri Cristo

¹²Ane nomünantü auna icu na cürü itopiquiti maniqui taman ñoñünrrü tücañe, naqui Adán. Sane nauquiche caüma namanaiña macirrtianuca icu na cürü coiñoma. Y namanaiña ito isamutema nomünantü. ¹³Antes que atorri arrüna nüriacarrü corobo tücañe, tanancatai nomünantü icu na cürü. Pero chütusiopü nurria nipünatema macirrtianuca, itopiqui champü nüriacarrü. ¹⁴Pero ta namanaiña coiñoma auquiti Adán hasta nitiemporrti Moisés. Arrüma isamutema nomünantü panaca chütusiopü ümoma yacüpurrrti Tuparrü. Tapü artri Adán tusio ümoti manu taman yacüpurrrti Tuparrü, y chümacoconaurrtipü. Ane arrüna machepecatarrrü ümoti Adán y artri Cristo, ¹⁵abu chisiupü arrüna isamutema.

Uiti Adán tücañe cuatü nomünantü oemo. Pero arrüna ñacususüancacarrrti Tuparrü cuatü oemo uiti Cristo. Ui manu nomünantü uiti maniqui taman coiñoma namanaiña. Pero manrrü segurorrü caüma que uiti naqui quiatarrrü, naqui Cristo torrio oemo ñacususüancacarrrti Tuparrü. ¹⁶Chichepito yachücoiti Adán y yachücoiti Jesucristo. Ta ui manu tamantai nünantü uiti Adán coiñoma sürümanama. Tapü uiti Cristo morrimiacana tato arrüba sürümana nomünantü ui macirrtianuca, y urria tato nacarrüma au narrrarrrti Tuparrü. ¹⁷Uiti Adán cuatü concorrü oemo. Pero tusio nurria oemo, uiti Jesucristo urria nusaca au narrrarrrti Tuparrü, tacana ñacumanatarrrti oemo. Osüboriquia ñana ichepeti y hasta bacheboti osüriacabo.

¹⁸Ui manu nomünantü uiti Adán cuatü carrticurrrü ümo namanaiña macirrtianuca. Pero caüma utaesübuca ñünana carrticurrrü, itopiqui artri Cristo macoconaurrti nurria ümoti Tuparrü. ¹⁹Artri Adán chümacoconaurrtipü. Sane nauquiche namanaiña isamutema nomünantü isiuti. Pero caüma ui ñacoconaurrti Jesucristo urria nusaca au narrrarrrti Tuparrü.

²⁰Arrüna nüriacarrü corobo, torrio uiti Tuparrü, nauqui atusi nurria arrüna nipünatema macirrtianuca. Pero auna cauta tusio chama nomünantü, manrrü tusio ito nibuenucurrrti Tuparrü. ²¹Ui noconco tusio que tarucu nomünantü osoi. Pero arrüna tarucu nucua ümoti Tuparrü tusio

ito, itopiqui torrio oemo uiti osüboriquibo arrüna chütacüirusupü. Torrio oemo auqui nacarrti Jesucristo, naqui uiche utaesübuca eanaqui nomünantü.

**Oconca ichepeti Cristo, osüboriquia
ito ichepeti**

6 ¹¿Isane caüma usurapoboibo? ¿Taqui urria uisamuneinqui arrüba nomünantü, nauqui atusipü manrrü nigraciarrti Tuparrü y nibuenucurrti? ²¡Tapü mapensaca sane! Arroñü caüma tacanarrtü toconca pünanaqui nomünantü. Sane nauquiche caüma chüpuerurrüpi osübori manrrü eana. ³Auqui nosüriqui usaca ichepeti Jesús, y sane usaca ito ichepe niconcorrti, tacanarrtü oconca ichepeti. ⁴Ui nosüriqui usaca tacanarrtü oeca cütü ichepeti Cristo. Pero arrti süboricoti tato ui nicusüurrti naqui Yäütoti. Sane ito arroñü caüma bacheboti nuevurrü osüboriquibo, nauqui auqui caüma urria nosüboriqui. ⁵Itopiqui arrtü oconca sane ichepeti Jesús, isiatai osüboriquia tato ichepeti. ⁶Itopiqui arrüna nurrianca ñome ba chomirriampü tone coiño ichepeti Jesús apü curusürrü. Sane nauquiche champü nümochequi uisamune isiu nurrianca ñome ba chomirriampü, tacanarrtü mosorrü onüpi ñome nurriancatoe. ⁷Tusio te oemo, arrti naqui coiño chüpuerurrüpi aisamunentiqui arrüna nomünantü. ⁸Nemanauntu te, usaca tacanarrtü oconca ichepeti Jesús. Sane nauquiche tiene que osübori ito ichepeti. ⁹Chauqui tütusio oemo que arrti Jesús süboricoti tato eanaqui macoiñoca ümo chanantopü tato aconti. Ensoro nanaiña nüriaca concorrü ümoti. ¹⁰Tamantai niconcorrti itopiqui nomünantü osoi. Caüma süboricoti ümoti Tuparrü. ¹¹Arraño ito tiene que apapensa sane: Chauqui tautaesübuca eanaqui nomünantü tacanarrtü auconca pünanaqui. Abaca caüma ichepeti Jesús, sane nauquiche ausüboriquia ito ümoti Tuparrü.

¹²Itopiqui arrüna sane, tapü apichücaño ñome ba nomünantü, mientras ausüboriquia icu na cürrü aübu cürrü naucütüpü. Tapü apichücaño arrtü cuatü aume naurrianca apisamune nomünantü. ¹³Tapü chebo aboi apisamune arrüba chomirriampü aübu naucütüpü. Apitorrimia naucütüpü y nanaiña nausüboriqui ümoti Tuparrü, nauqui ayurati aume apisamune arrüna urria. Itopiqui tücañe amoncaño tacana auconca eana nomünantü, pero caüma ausüboriquia ümoti Tuparrü. Sane nauquiche caüma puerurrü apisamune arrüna urria aübu naucütüpü. ¹⁴Tacürusu nurria nüriaca nomünantü aume, itopiqui champürrtü ausüboriquiaiqui ui napacoconauncu ümo nüriacarrü, ta ui nigraciarrti Tuparrü aume.

Machepecatarrü: Bama mosorrüma ümo nomünantü

¹⁵Aensapü puerurrü uisamune arrüba chomirriampü, arrtü osüboriquia ui nigraciarrti Tuparrü, y chuiüpü nüriacarrü urria nusaca? ¡Champü te! ¹⁶Suraboira arrüna sane ausucarü: Arraño puerurrü apatacümanauncu ñacuti ümoche aurrianca apaserebi tacana mosorrü. Aboma torrü: Arrüba nomünantü, y arrti Tuparrü. Arrtü apisamute nomünantü, tone caüma

naupatron, y auconca uirri. Tapürrtü apacoconaunca ümoti Tuparrü, urria nabaca au narrtarri. ¹⁷Tücañe apaserebiquia ümo nomünantü. Pero chapie ümoti Tuparrü, caüma apacoconaunca aübu nanaiña nabasasü ümo arrüna ñemanauncurratoe manunecatarri, arrüna amoncoi. ¹⁸Tautaesübuca eanaqui nomünantü. Caüma apaserebiquia ümoti Tuparrü, y urria nausüboriqui.

¹⁹Surapoi arrüna machepecatarri ümo bama mosorri y ümo bama mapatroneca, nauqui manrrü aüro au nautanu arrüna manunecatarri. Tücañe abaca tacana mosorri, y nomünantü tacana naupatron. Uirri churriampü nausüboriqui au narrtarri Tuparrü. Caüma tiene que apaserebi ümo arrüna urria, nauqui ausamomeca ümoti Tuparrü. ²⁰Tücañe nauquiche apisamute nomünantü, champü nümoche aboi arrüna urria. ²¹¿Causane nausüboriqui tücañe uirri? Ta churriampü. Sane nauquiche caüma tarucu naucüso itacu, itopiqui au nitacürrü auconcapü ui manu sane nausüboriqui, cuapütü carrticurrü aume. ²²Pero caüma tautaesübuca eanaqui nomünantü, apaserebiquia caüma ümoti Tuparrü. Apisamute arrüna urria ümoti. Au nitacürrü iyebo aboi au napese, auna cauta champü nitacüru nausüboriqui. ²³Arrtü uisamute nomünantü, cuatü bapacatarri oemo, ta concorri y carrticurrü. Pero arrüna ñacumanatarri Tuparrü oemo, ta nosüboriqui ümo para siemperrü au napese itopiquiti Jesucristo naqui Señor.

Machepecatarri: Arrtü opoca

7 ¹Suraboira quiatarri machepecatarri ausucarü, masaruquitaqui. Arraño apisuputacai nurria nüriacarrü. Tusio te aume que usaca iquiana nüriacarrü solamenterrü arrtü osüboriquiaiqui; arrtü toconca champü.

²Tone arrüna machepecatarri: Taman päürrü poso ane bacüpuurrü ümo, tapü ñoconoti iquiana, mientras süboricotiqui. Pero arrtü tücoiñoti, chüvaleoquipü manu bacüpuurrü ümo. ³Arrtü süboricotiqui iquiana y sürotü isiuti quiatarri, ane nipüenate. Tapürrtü coiñoti, arrümanu nüriacarrü caüma chüvaleoquipü ümo. Puerurrü caüma apo tatito aübuti quiatarri.

⁴Sane ito arraño, masaruquitaqui. Auconca ichepeti Cristo. Sane nauquiche chabacaiquipü iquiana nüriacarrü. Caüma apicococati quiatarri, naqui Jesucristo, naqui süborico tato eanaqui macoiñoca. Uiti caüma puerurrü apisamune arrüna urria ümoti Tuparrü. ⁵Tarucapae nurrianca ñome ba chomirriampü. Manrrü tarucapae itopiqui tusio oemo icuqui nüriacarrü isane arrüna urria y arrüna churriampü. Pero urriancatai ñoma ba chomirriampü, y uisamute aübu na cürrü nocütüpü aruqui nanaiña nomünantü. Uirri oconca y cuatü carrticurrü oemo.

⁶Pero caüma chusacaiquipü iquiana nüriacarrü, usaca tacanarrtü oconca pünanaqui. Champürrtü baserebiquia ümoti Tuparrü ui numacoconaunca ümo. Caüma baserebiquia ümoti uiti Espíritu Santo.

Nomünantü y nüriacarrü

7¿Causanempü caüma? ¿Taqui ane nomünantü osoi ui nüriacarrü? iNo, champü! Pero chüpuerurrüpü atusi oemo nomünantü, arrtü nampü champü nüriacarrü arrüna corobo. Supiarrtü tarucu nurrianca ümo nenarrirrti quiatarrü. Chütusiopü oemo arrtü nomünantü arrüna sane. Tapü ui nüriacarrü tusio, ta ane corobo sane: “Tapü arrianca ümo nenarrirrti quiatarrü”. 8Sane nauquiche ui arrüna bacüpucurrü ane nurrianca ñome aruqui nanaiña nenarrirrti quiatarrü. Tapürrtü champü bacüpucurrü, champü ito nomünantü. 9Tücañe chisuputacaipü nüriacarrü, anancañü saneantai icu na cürrü. Pero numo tisuputacai, auqui tusio iñemo arrüna tarucu nomünantü sobi. 10Ui nomünantü caüma isonca. Arrti Tuparrü rranrrtipü nauqui isübori ui nüriacarrü. Pero uirri caüma isonca, y cuatü carrticurrü iñemo. 11Arrüna nomünantü tacanarrtü encañao iñemo aübu na urria nüriacarrü, itopiqui ui arrüna isamute nomünantü cuatü nisonco, champü nümochequi iñemo nüriacarrü, nauquipü isübori uirri.

12Pero tusio iñemo que arrüna nüriacarrü torrio ulti Tuparrü, ta urria, champü causane. 13¿Causanempü caüma? ¿Aensapü isonca ui arrüna urria? No champü. Arrüna nomünantü tone uiche aítabajonü. Tapü nüriacarrü urria, uirri tusio iñemo que bien churriampü arrüna nomünantü. Tusio nanaiña nomünantü ui nüriacarrü.

14Torrio te ulti Tuparrü nüriacarrü. Pero arrüñü ñonünrrü. Chipiapü icoco, tacanarrtü mosorrüñü ümo nomünantü. 15iCausanempü arrüna niyachücoi! Itopiqui chisamutempü arrüna urria iñemo, tapü arrüna ünantü iñemo, tone isamute. 16Ui arrüna sane tusio iñemo que nüriacarrü urria, tapü nomünantü churriampü uisamune. 17Sane te, champürrtü arrüñü isamute arrüna churriampü, ta arrüna nomünantü ane sañü, o sea yaca mecu. 18Tusiatai iñemo champü isane urria puerurrü isamune sobiatoe. Irrancatai isamune arrüna urria, pero chüpuerurrüpü. 19Chisamutempü arrüna urria isiu nirrancia isamune, ta isamute arrüna churriampü, arrüna chirrancapü. Chüsamianapü iñemo. 20Uirri te tusio nurria que champürrtü sobiatoe isamune arrüna churriampü, ta ui naca nomünantü sañü, tacanarrtü yaca mecu.

21Así que saneantai nisüboriqui: Irranca isamune arrüna urria, pero ta nantarrai yarrtai arrüna nomünantü sobi. 22Urriantai iñemo icocorio arrüba yacüpucurrü Tuparrü. Irranca icocorio aübu nanaiña niñapensaca. 23Pero arrüna cürrü nisütüpü ane quiatarrü nüriacarrü ümo, uiche isamune arrüna nomünantü. Arrümanu nüriacarrü bahiyo aübu niñapensaca urria. Uirri yaca tacana au preso ui nomünantü. 24Suraboira sane: Irranca isamune isiu nirrancarrrti Tuparrü aübu nanaiña niñapensaca, pero aübu arrüna cürrü nisütüpü icocota quiatarrü nüriacarrü nesa nomünantü.

25 ¡Tarucu nichaquisürücü y nisuchequi ui arrüna sane nisüboriqui!
 Isonca te ñana uirri. ¿Causane sobi? ¿Quitipü nauqui puerurrü
 aitaesümunutiñü pünanaqui arrüna sane nisüboriqui? ¡Chapie ümoti Bae
 Tuparrü! Arrti icüpurutiti Señor Jesucristo, naqui Señor. Uiti ichaesübuca.

Osüboriquia uiti Espíritu Santo

8 ¹Sane nauquiche caüma champüqui arrüna itopiquiche ayetü carrticurrü
 ümo bama aboma ichepeti Jesucristo, bama icocoromati. ²Arrüma caüma
 aboma iquiana quiatarrü nüriacarrü, arrümanu nüriacarrü uiti Espíritu Santo.
 Abu tücañe amonco oñü iquiana manu nüriacarrü uiche uisamune nomünantü
 y uiche oconca. Pero ui nüriacarrrti Espíritu Santo utaesübuca eanaqui
 nomünantü, y torrio osüboriquibo uiti Jesucristo. ³Arrüna corobo nüriacarrü
 chübaserebiopü oemo, itopiqui chucusüucapü, y chüpuerurrüpü uicoco. Pero
 arrti Bae Tuparrü bapacheroti niquiubuti, causane nauqui puerurrü aiquiaübuti
 nomünantü. Icüpurutiti naqui tamantiatai Aütorrti, nauqui aisamunutiýü
 ñoñünrrü aübu currü nicütüpürrti. Aübu manu cürrü nicütüpürrti coiñoti,
 nauqui aurrimiacana tato nomünantü osoi. ⁴Sane nauquiche puerurrü uña
 nosüboriqui isiu arrüna nüriacarrü ane corobo, itopiqui osüboriquia ui
 nicusüurrti Espíritu Santo, champürrti ui nuñüñemantoe.

⁵Arrti naqui bavivico au nuñemarrtiatoe, isamutenti isiu nirrancarrrtiatai.
 Tapü arrti naqui bavivico uiti Espíritu Santo isamutenti isiu nirrancarrrti Tuparrü.

⁶Arrtü uisamute isiu nurriancatai, oconca uirri ñana, cuatü carrticurrü oemo.
 Tapü arrti Espíritu Santo bacheboti osüboriquibo ichepeti Tuparrü. Uiti urria
 nusaca. ⁷Arrübama bavivicoma saneantai isiu ñapensacarrümantoe aboma
 tacana nesarrrti enemigorrrü Tuparrü. Chümacoconaurrüpüma ümo nüriacarrrti.
 Chüpuerurrüpüma acoconauma. ⁸Itopiqui arrübama rranrrü aisamunema isiu
 nirrancarrrümantoe chüpuerurrüpüma aisamunema isiu nirrancarrrti Tuparrü.

⁹Pero arraño champürrti apaviviquia isiu naurriancatoe, ta isiu
 nirrancarrrti Espíritu Santo. Ui arrüna sane tusio que tapasuquiucati Espíritu
 Santo au nabausasü. Itopiqui arrti naqui chüyasuriurutitipü Espíritu Santo
 esaquiti Cristo, chüpertenecebotipü ümoti Cristo. ¹⁰Arrüna naucütüpü tiene
 que acon ñana itopiqui nomünantü, panaca arrti Cristo anati au nabausasü.
 Pero nabausüpü tiene que asübori uiti Espíritu Santo, itopiqui urria nabaca
 au narrtarrrti Tuparrü. ¹¹Pero como arrti Tuparrü ticüpurutiti Espíritu Santo
 au nabausasü, uitito bosüborico tato naucütüpü ñana.

¹²Sane nauquiche, masaruquitaquí, chauqui tamarrtai, tutaesübuca eanaqui
 arrüba nurriancatoe. Champü nümochequi uisamune yusiu. ¹³Arrtü apiñata
 nausüboriqui isiu naurriancatoe, auconca uirri, cuatü carrticurrü aume. Pero
 ui nicusüurrti Espíritu Santo puerurrü apitacünucuta arrüna naurrianca ñome
 ba chomirriampü. Arrtü apisamute sane, ausüboriquia nurria ichepeti Tuparrü.

¹⁴Itopiqui namanaiña bama oncoimia nurarrrti Espíritu Santo y icocotama,
 tonema bama aütorrrti Tuparrü. ¹⁵Tapü aupirrucaiqui ñünanati Tuparrü

tacanati mosorrü ñünanati patrón. Itopiqui arrti itorrimianatiti Espíritu Santo aume. Uiti tusio aume que champürrtü mosorrü año ümoti Tuparrü, ta aütorrti año. Uiti Espíritu Santo caüma puerurrü amucanaño ümoti Tuparrü: “Suyaiü”.
¹⁶Uitito Espíritu Santo tusio nurria au nutusi que ñemanauncurratoe aütorrti Tuparrü oñü. ¹⁷Arrtü sane, arrti Tuparrü macumananati oemo nanaiña nenarrirrti. Itorrimiatati oemo isiatu tacana arrüna torrio uiti ümoti Cristo. Arrtü ñemanauncurratoe utaquisürüca icu na cürrü tacana nitaquisürücürrti Cristo tücañe, tiene que aye ito osoi ñana au napese esa nanentacarrti.

Urriampae nusaca ñana esati Tuparrü

¹⁸Caüma ane nutaquisürücü icu na cürrü. Pero tusio nurria iñemo, contoatai tacürusu numaquionco iyo, arrtü uiñatai au manu nanentacarrti Tuparrü champü tacanache. ¹⁹Nanaiña arrüba omirriante uiti Tuparrü parrüperara ümo manu nanenese anche ñana tusioma bama aütorrti Tuparrü eana nanentacarrti. ²⁰Itopiqui nanaiña arrüba omirriante uiti abe mupaurramana. Sane nauquiche nantarrai omiñarrio tato (mocoño, boporeo, mumameso chübururaupü). Sane nubacarrtü, pero champürrtü oboirrapatoe, ta itopiqui sane nirrancarrti Tuparrü. ²¹Pero turapoiticaü Tuparrü que ñana tiene que autaesübu ñünana manu mapaurramacarrtü, nanaiña arrüba omirriante. Sane caüma abe ito bosüborico eana nanentacarrti tacana bama aütorrti. ²²Tusio oemo que nanaiña arrüba omirriante uiti Tuparrü butaquisürü icu na cürrü, tacana arrone taman paürrü tirranrrü anati ipiaümacarrtü icu cürrü. ²³Sane ito arroñü. Chauqui tütorrioti Espíritu Santo oemo, nauqui atusi pario oemo arrümanu urrimapae nosüboriqui ñana. Pero usacaiqui icu na cürrü. Tarucu nubarrüperaca ümo manu nanese anche ñana yasuriuruti oñü Tuparrü taha esati tacana ñemanauncurrtoe aütorrti, y sane utaesübuca caüma auqui norrococa y concorrtü.

²⁴Chauqui tutaesübuca. Pero barrüperacaiqui nauqui basuriu nurria arrüna nutaesübucu, itopiqui ane arrüna chütorrioquipü oemo. Arrtü nampü tütorrio oemo nanaiña y chauqui tiyebopü osoi au nanentacarrti Tuparrü, champüqui nümochebü barrüpera, itopiqui champüti nauqui barrüperara ümo arrüna tütane uiti. ²⁵Pero arroñü barrüperaca masamuña nurria cümenu arrüna urria cuabotiqui, arrüna chübarraiquipü.

²⁶Arrtüto Espíritu Santo bayurarati oemo, itopiqui chucusüucapü y chütusiopüqui nurria oemo. Chuipiacapü nurria oñean. Pero arrti Espíritu Santo nauqui anati au nuyausasü meaboti utacu ümoti Tuparrü. Arrtü tarucapae penarrü uiti utacu, y ane nauche chümanitacapü uiti, oñonquisiatu tarucapae. ²⁷Pero arrti Tuparrü tusiatai ümoti numapensaca au nutusi. Tusio ito ümoti arrüna urapoiti Espíritu Santo utacu, itopiqui arrti meaboti utacu isiu nirrancarrti Tuparrü.

²⁸Tarucu nicuarrti Tuparrü oemo. Sane nauquiche batrabacarati usaübu, nauqui urria nusaca ui nanaiña arrüna pasabo oemo isiu ñapensacarrti oemo. ²⁹Utacümanauncuca uiti auqui ñemonco, y usamamecaca uiti, nauqui campiabo nusaca tacana nacarrti Aütorrti,

naqui Jesucristo. Sane caüma aboma siürümanama aütorrti Tuparrü, pero arrti Cristo, tonenti yarusürürü eanama. ³⁰Itacümanauncunuti oñü. Auqui itasuruti oñü. Auqui morrimiacana tato nomünantü osoi, nauqui urria nusaca au narrtarrti, y tiene que aye osoi esati au nanentacarrti.

Chüpuerurrüpü atacüru nucua ümoti Tuparrü

³¹¿Isane manrüü usurapoboibo ümo arrüna sane? Ucuasürüca ümoti Tuparrü. ¿Ñacutipü puerurrü aisamunenti churriampü oemo? ³²Arrti Tuparrü itorrimianatitiatai naqui tamantai Aütorrti, nauqui aconti otopiqui. Segururrü itorrimiatatito oemo nanaiña arrüna nurriantümo. ³³Champüti naqui puerurrü uraboti oñü isucarüti Tuparrü, itopiqui utacümanauncuca uiti y uitito utaesübuca eanaqui nomünantü. ³⁴Ñacutipü puerurrü aheti oemo carrticurrü? ¿Taqui arrti Cristo? No champü, itopiqui arrtiatoe coiñoti otopiqui y süboricoti tato. Sane nauquiche caüma anati tümonsoti au nepanauncurrti Bae Tuparrü au napese. Acamanu manitanati utacu. ³⁵¿Uichepü puerurrü atacüru nucua ümoti Cristo? ¿Taqui ui nutaquisürücü ui nitüborirrimia macirrtianuca oemo? No, champü. ¿Taqui ui nocürüpü, o ui arrüna champü isane osoi, o ui peligrorrü, o ui arrünarrtü utaboriquia? No, champü isane uiche puerurrü atacüru nucua ümoti. ³⁶Pero sane te nantü icu Nicororrü:

Tüsaipü suisonca naneneca auqui naca, Tuparrü.

Iquianama somü tacana arrone nobirrama iquiatama nauqui aitaibaimia.

³⁷Tonehio arrüba nutaquisürücü, pero upucünuncatai, itopiqui arrti Cristo bayuraratü oemo. Ocuasürüca ümoti. ³⁸Tusio nurria inemo, chüpuerurrüpü atacüru nucua ümoti Tuparrü, ni aunampü nosüboriqui icu na cürü, nipü arrtü oconca, ni ui bamapü angelerrü, ni ui bamapü machoboreca, ni caümampü, ni ñanapü, ³⁹ni ui bamapü au napese ni ui bamapü au infierno. Itopiqui tusio nucua ümoti Tuparrü ui niyequirrti Jesucristo icu na cürü. Sane nauquiche champü isane uiche puerurrü atacüru nucua ümoti.

Arrübama israelitarü tacümanauncunuma uiti Tuparrü

9 ¹Caüma irranca suraboi ausucarü arrüna bien ñëmanauntu. Surapoito isucarüti Cristo, itopiqui tusio nurria au nichusi uiti Espíritu Santo, ta ñëmanauntu arrüna sucanañü caüma. ²Orronene nurria au niyausasi naneneca y tobiquia, y tarucu nisuchequi itacu bama israelitarü, bama isaruquitaqui, itopiqui arrüma chicocoromatipü Jesús. ³Urriampü inemo ipiaurramanañü y yerotüpü peese pünanaquiti Cristo, arrtü uirripü puerurrü itaesümununuma eanaqui nomünantü. ⁴Itopiqui arrüma tacümanauncunuma uiti Tuparrü. Aboma tacana bama aütorrti. Itusiancatati isucarüma arrüna nanentacarrti champü tacanache. Masamunuti tratorrtü aübuma, y itorrimiatati nüriacarü ümoma, arrüna corobo. Ane niporrti Tuparrü esama, cauta anauma ümoti. Y arrti urapoiticaü isucarüma, tiene que acurusüma uiti. ⁵Arrüma auqui nesarrüma familiarrü bama antiburrü

uyaütaiqui, arrti Abraham, arrti Isaac y arrti Jacob y bama maquiataca. Y arrti Cristo israelitarrito, itopiqui nipiactüti israelitarri. Tonenti naqui Tuparrü, naqui ane nüriacarri ümo nanaiña. Tapü tacürusu numanauncu ümoti. Amén.

⁶¿Aensapü chücumplibotipü Tuparrü aibu nurarri ümo bama israelitarri? No, chüsanempü. Pero nurarri valeo solamenterrü ümo bama ñemanauncurratoe israelitarri, itopiqui champürrü namanaiña bama israelitarri tonema bama nesarri genterrü Tuparrü. ⁷Arrüma aboma eanaqui nesarri familiarri Abraham, pero champürrü uirri aboma curusüoma tacanati Abraham. Ta arrümanu nurarri Tuparrü ümoti Abraham tücañe nantü sane: “Uiti Isaac aboma bama ñemanauncurratoe aütaiqui”. (Itopiqui aboma ito bama maquiataca aütorri Abraham.) ⁸Arrübama maquiataca aütorri Abraham chitonempüma bama curusüoma uiti Tuparrü, ta arrti Isaac y bama aütorri, itopiqui arrti anati icu cürrü ui nurarri Tuparrü ümoti Abraham. ⁹Tone arrümanu nurarri Tuparrü ümoti tücañe: “Cuatü añorrü tacana na caüma nanenese iseca tato. Auqui caüma ane nipiäumaca Sara”. Sane nauquiche anati icu cürrü Isaac.

¹⁰Isiatai pasao ümo nicüpostoti Isaac, nürirri Rebeca. Aboma torrü aütorri Isaac auqui Rebeca, tocaca. ¹¹⁻¹²Pero arrti Tuparrü itacümanauncunutiti maniqui taman eanaqui bama torrü isiu nirrancarriatöe. Sane nauquiche nantü ümo Rebeca: “Arri yarusürürrü baserebioti ñana ümoti tapaurri”. Nanti sane antes que aboma icu cürrü, y champü isane niyachücoimiainqui, ni arrüna urriampü, ni arrüna churriampü. Tacümanauncunuti maniqui taman isiu nirrancarriatöe Tuparrü, champürrü ui arrüna urria niyachücoiti. ¹³Sane ito nantü icu Nicororri: “Arri Jacob cuasürüti iñemo, pero arrti Esaü champü”.

¹⁴¿Causanempü caüma? ¿Taqui churriampü arrüna niyachücoiti Tuparrü? No, urria. ¹⁵Ta arrti Tuparrü nantü tücañe ümoti Moisés sane: “Ipucüruca itacuti naqui irranca, y aboma bama taquisürüma iñemo isiu nirrancatöe. ¹⁶Sane nauquiche arri Tuparrü champürrü yasuriuruti oñü ui na tarucapae nurrianca ümoti, o ui na arucu nurria oemo nubatrabacaca ümoti, ta ui na nipucürurrtiatai utacu. ¹⁷Sane ito nantü Tuparrü tücañe turuquiti Moisés ümoti maniqui yüriaburri Faraón au Egipto: “Iñacü yüriaburricü, nauqui itusianca au nasüboriqui arrüna nisüsü, sane nauqui uirri atusi nisüri au nanaiñantai icu na cürrü”. ¹⁸Así que arri Tuparrü isamutenti isiu nirrancarri. Taquisürüma ümoti bama urria au ñaquiöncorri, y maquiataca chirranrüpüma oncoimia nurarri, abu uitito.

Tacümanauncunuma uiti Tuparrü bama urria au ñaquiöncorri

¹⁹Amucanaño caüma iñemo: “Arri sane, ¿causane ane nuiüinate aübuti Tuparrü? Champüti te ane manrü nüriacarri pünanaquiti. Namanaiña te tiene que aisamunema isiqui nirrancarri”. ²⁰Pero apapensa te. ¿Isanempito nusaca nauqui puerurri usuratoqui aübuti Tuparrü? Arroñü mañoñüncatai. Apapensa baeta ümo noyarrü. Chüpuerurripü anquiriu pünanaqui na uiche urriane: “¿Causane aisamunuñü sane?” ²¹Arrüna paürrü ane te nüriacarri

na asamu aübu taurrü isiu nirrancarrü. Puerurrü asamu ui cümüinta taurrü taman siucurrü coñorrtai y ui quiatarrü nicüuintarrü puerurrü asamu quiatarrü arrüna auna ausübu sumenurrü. ²²Aboma bama icu na cürrü ümo cuabotiqui carrticurrü, y arrti Tuparrü itusiancatati nicusüurrti aübuma. Porque chauqui tütarucapae nimialocorrüma. Urria arrtü inñatai carrticurrü ümoma. Abu arrti Bae Tuparrü tucoboi ñasamunauncurrti aübuma. ²³Aboma ito bama icu na cürrü pucürusuti itacuma. Rranrrti aitusiancati nüriacarrti aübuma, arrüna champü tacanache. Tonema bama sürobotü au napese. Tacümanauncunuma ümo arrüna uiti. ²⁴Ta arroñü utacümanauncuca uiti ümo arrüna sane. Oñeana aboma bama israelitarrü, pero aboma ito bama chütüpü israelitarrü. ²⁵Sane ito ñaconomosorrti maniqui profetarrü Osea:

Caüma yasuquiucama tacana niyesa genterrü bama
chisuputarapümanü tücañe, nanti Tuparrü, y arrübama
chücuasürüpüma inñemo tücañe, caüma tiene que acuasürüma inñemo.

²⁶ Tücañe sucanañü ümoma:

“Arraño chütüpü isaütaiqui”.

Pero caüma sucanañü ümoma:

“Yasuquiucañe tacana bama isaütaiqui.

Arraño caüma aütorrti Tuparrü, naqui süborico.

²⁷ Ane ito quiatarrü nicororrü cütüpü bama israelitarrü. Arrümanu nicororrü uiti profetarrü Isafás. Nanti sane:

Panaca arrübama israelitarrü sürümanamapü, tacana cüosorrü abeu turrü nubiquirrimia, pero mümanamantai eanaquimia tiene que ataesübuma ñünanai carrticurrü.

²⁸ Y arrti Señor bacheboti tarucu carrticurrü ümo na cürrü unrratorrtai.

²⁹ Arrti Isafás nantito sane:

Arrtü chutaesübucapü bama mümanamantai israelitarrü uiti
Tuparrü, pasaopü oemo tacana ümo bama pohoso au manio
puebluca tücañe, nobürirri Sodom y Gomorra.

Arrübama israelitarrü chicocoromatipü

Jesucristo

³⁰ ¿Isane caüma usurapoboibo? Suraboira arrüna sane: Arrübama chütüpü israelitarrü chübapacheropüma tücañe niquiubuma causane nauqui urria nacarrüma aübuti Tuparrü. Pero caüma chauqui tiyebo uimia arrüna sane, ui arrüna icocoromati Jesús. ³¹ Pero arrübama israelitarrü rranrüma aicocoma nanaiña nüriacarrrü, nauqui urria nacarrüma aübuti Tuparrü, pero chiyebopü uimia. ³² ¿Causanempü chiyebopü uimia? Itopiqui arrüma rranrüma nauqui urria ñaquioncorrti Tuparrü ümoma ui arrüna arucu nurria ümoma y arrüba ausüratai isamutema ümoti. Pero chirranrüpüma oncomatü ümoti, nauqui urria ñaquioncorrti ümoma. O sea arrüma

popetabarrioma ui “manu canrrü uiche utaübüca”. Arrümanu sane es machepecatarrü icuqui Nicororrü. ³³Ta ane corobo nurarrti Tuparrü sane:

Amasasai nurria.

Iñata taman canrrü onü manu yiriturrü nürirri Sión au Jerusalén.

Ui manu canrrü popetabarrioma macrirrtianuca y uirri taübücoma.

Pero arrti naqui oncotitü ümo manu canrrü, tonenti naqui

chücüsobotipü ñana.

Urria nacarrti.

(Machepecatarrü arrüna sane. Arrümanu canrrü tonenti Jesucristo.)

10 ¹Masaruitaiqui, irranca aübu nanaiña niyausasü, nauqui puerurrü ataesübuma eanaqui nomünantü bama israelitarrü. Rreanca ümoti Tuparrü itacuma. ²Yarrtai te arrüna tarucu narucurrü ümoma ui nirrancarrüma aisamunema isiu nirrancarrti Tuparrü. Pero arrüma chütusiopü ümoma causane nauqui urria nacarrüma au narrtarrti. ³Chütusiopü ümoma causane uiti Tuparrü nauqui urria nusaca aübuti. Rranrrüma aicoñocomo nisüboriquirrimia aübuti urrimiantoe. Sane nauquiche caüma chüpuerurrüma asuriuma arrüna ñapensacarrti oemo, nauqui urria nusaca aübuti. ⁴Tücañe rranrrüma macrirrtianuca aye uimia esati Tuparrü ui ñacoconauncurrüma ümo nüriacarrü. Pero chauqui tiñataiti Cristo. Uiti tacürusu arrüna sane. Namanaiña bama icocoromati caüma, iyebo uimia esati Tuparrü.

⁵Ane te corobo uiti Moisés tücañe causane nauqui urria nusaca au narrtarrti Tuparrü. Nanti sane: “Artri naqui icocoriontiño nanaiña arrüba bacüpucuca, y chümasamunutipü nomünantü, tonenti naqui süboricobo aübuti Tuparrü”.

⁶Pero ane quiatarrü manunecatarrü ümo bama urria nacarrüma aübuti ui na icocoromati Jesús. Nantü sane icu Nicororrü: “Champü nümoche aürotü au napese, nauqui aiquianati Cristo tauna icu na cürrü. ⁷Champü nümoche aürotü au nicü bama coiño, nauqui asüboriti tato Cristo obi”. ⁸Itopiqui ane ito corobo sane: “Tusiatai aemo nurarrti Tuparrü au nausasü, y urapoi ito”. Abu tone arrüna supanunecaca nauqui apicocoroti Jesucristo, nauqui urria nabaca aübuti Tuparrü. ⁹Nauqui autaesübu eanaqui nomünantü, tiene que aburaboi sane: “Artri Jesús tonenti Señor”. Y tiene que aicoco aübu nanaiña nausasü que arrti süboricoti tato eanaqui macoiñoca. ¹⁰Sane nauquiche arrtü oñoncatü ümoti Tuparrü aübu nanaiña nuyausasü, yasuriuruti oñü, y arrtü usurapoito isucarü macrirrtianuca nürirrti Cristo, utaesübuca eanaqui nomünantü.

¹¹Sane ito ane corobo: “Artri naqui oncotitü ümoti Tuparrü chücüsobotipü ñana, arrtü bacurrtarati Tuparrü”. ¹²Arrüna manunecatarrü valeo ümo bama israelitarrü y ümo ito bama chütüpü israelitarrü, itopiqui anati tamantiatai Señor. Taesüburuma nurria uiti namanaiña bama manquioma pünanaquiti. ¹³Itopiqui ane ito corobo sane: “Namanaiña bama yabiromati Tuparü na ayurati ümoma, tonema bama taesüburu eanaqui nomünantü. ¹⁴Pero arrübama macrirrtianuca tiene que aicocoromati Cristo primero, nauqui puerurrü abiromati Tuparrü. Porque arrtü chütusiopü ümoma arrüna urriampae manitacarrü, chüpuerurrüpi

aicocoromati. Sane nauquiche tiene que anati naqui urapoi isucarüma arrüna sane. ¹⁵Tiene que anaito naqui bacüpuru ümo bama sürobotü aibu nurarrti Tuparrü. Sane te nantito icu Nicorrrü: “Urriampae oemo niyequirrimia bama urapoiomia arrüna urriampae manitacarrü”. ¹⁶Pero champürrtü namanaiña rranrrüma oncoimia arrüna urriampae manitacarrü. Arrti profetarrü Isaías nanti sane tücañe: “Señor, ¿quitipü rranrrü aicoco arrüna suburapoi?” ¹⁷Sane te, uicococati Jesucristo, itopiqui oñonsapetio nurria arrüna manitacarrü icütüpüti.

¹⁸¿Carü caüma bama israelitarrü? ¿Taqui choncoipüma arrüna manitacarrü? Abu oncoimia. Ane corobo sane:

Oncoimia nura bama urapoiomia nurarrti Tuparrü au nanaiñantai icu na cürü.

¹⁹Rranquiriura tatito: ¿Taqui chiyeboipü nurarrti Tuparrü ui bama israelitarrü? No, iyebo te uimia, itopiqui tücobo ane corobo uiti Moisés sane:

Sane nurarrti Tuparrü ümo bama israelitarrü:

Sobi caüma abubatio ümo bama chütüpü israelitarrü.

Sobi autüboriquia ümo bama champü ñapanauncurrüma au napaquionco, arraño bama israelitarrü.

²⁰Sane ito ane corobo uiti Isaías:

Ichabüca ui bama chiyapacheriurumapüñü, nanti Tuparrü.

Itusiancacañü isucarü bama champü nümoche uimia nisüri tücañe, bama chütüpü israelitarrü.

²¹Pero icütüpü bama israelitarrü maconomonotito Isaías sane:

Nanti Tuparrü:

Naneneca niyatasucu ümo bama israelitarrü, pero arrüma chirranrrüpüma acoconauma y uratoquiomantai iñemo.

Arrübama mümanamantai israelitarrü taesüburuma

11 ¹Sane nauquiche rranquiriura arrüna sane: ¿Aensapü onconoma bama israelitarrü uiti Tuparrü? ¿Champü nümochemainqui uiti? Abu chüsanempü. Ta arrüñü ito israelitarrüñü. Yaca eanaqui nesarrti familiarrü Benjamín y nesarrti familiarrü Abraham. ²Arrübama israelitarrü tacümanauncunuma uiti Tuparrü tücañe. Chüpuerurrüpü oncoma uiti. Apaquioncaño iyo arrüna ane corobo icütüpüti maniqui profetarrü Elías, numo manitanati ümoti Tuparrü apü na genterrü Israel. ³“Señor, nanti, chauqui tütaborioma bama maquiataca profetarrü ui na genterrü, y arrüba altar aemo omiñarrio uimia. Tamañünqui yacaiqui icococi, pero rranrrüma ito caüma aitaibairomañü”. ⁴Apaquionsaño nurria ümo arrüna iñumutati Tuparrü sane: “Champürrtü tamancüatai oncoca. Abomainqui siete mil mañoñünca baserebio iñemo y isuasürücaiqui ümoma. Arrüma champürrtü manaunuma ümo manu quiatarrü tuparrü nürirri Baal”. ⁵Sane ito pasabo caüma. Aboma bama mümanamantai israelitarrü tacümanauncunuma uiti Tuparrü, itopiqui

pućirusuti itacuma. ⁶Tacümanauncunuma uiti champürrtü ui arrüna urria niyachücoimia, ta ui arrüna ñemanauncurratoe nipucüurrti itacuma.

⁷¿Isane caüma surapoboibo? Arrüna genterrü Israel champürrtü iyebo uimia arrüna urria nacarrüma aübuti Tuparrü. Arrübama mümanamantai eanaquimia iyebo uimia, bama tacümanauncunu uiti Tuparrü. Arrübama maquiataca caüma tarucapae nitai nausasürrüma uiti Tuparrü, chüpuerurrüpü onsaperioma. ⁸Nantü sane icu Nicorrrü icütüpüma:

Uiti Tuparrü aboma tacanarrtü manumuma.

Abe nirrtorrrüma, pero chasarapümatü.

Ane numasurrüma, pero chonaunrrüpüma.

Sane nacarrüma caümainqui.

⁹Nantito yüriaburrü David tücañe:

Mientras masamunuma pierrta ññatai carrticurrrü ümoma, tacanarrtü tabücomantai ui metorrrü.

¹⁰Tari supusuma, tapü arrtanauma.

Tari yaserebirama tacana mosorrrüma enterurrü nisüboriquirrimia.

Taesüburuma eanaqui nomünantü bama chütüpü israelitarrü

¹¹Rranquiriura tatito: Aensapü penecoma bama israelitarrü iche pünanaquiti Tuparrü ümo chanantopü asarati tato ümoma? No, champürrtü sane. Pero uirri arrti Tuparrü rranrti caüma ataesümunucuti ümo bama chütüpü israelitarrü, itopiqui arrübama israelitarrü chirranrrüpüma oncoimia. Tiene que ubatioma bama israelitarrü arrüna ñacunusüancacarrrti Tuparrü ümo bama maquiataca. Rrepente rranrrüma ito ümo. ¹²Así que ui arrüna chümacoconanrrüpüma bama israelitarrü cuatü arrüna omirria ümo bama chütüpü israelitarrü. Arrüma caüma curusüoma, itopiqui arrübama israelitarrü chiyebopü uimia esati Tuparrü. Pero ñana, arrtü icocoromatito Jesús, manrrü yarusürürrü ñacunusüancacarrrti Tuparrü ümo nanaiña genterrü icu na cürü.

¹³Rraparira baeta aume, bama chütüpü israelitarrü. Ipucünunca aucuata, itopiqui arrti Tuparrü icüpurutiñü tacana apóstol ñü aume. ¹⁴Icüpurutiñü tanu aume, nauqui pesabatai ümo bama israelitarrü arrüna iyebo aboi. Sane nauqui aboma bama mümanama eanaquimia taesüburu eanaqui nomünantü. ¹⁵Champü nümochema uiti Tuparrü bama israelitarrü, sane nauquiche ane caüma marrimiacatarrü ümo bama maquiataca icu na cürü. Pero ane ito niyüicürrü ümo bama israelitarrü, arrtü urrian tato nacarrüma aübuti Tuparrü. Auqui caüma hasta bama coiño süboricoma tato.

¹⁶Ichepecacama bama israelitarrü tacana taman pan. Arrtü taman peasorrrü pan samamecana ümoti Tuparrü, samamecana ito enterurrü manu pan. Ichepecacama ito tacana taman suese. Arrübama antiburrü yaütorrrüma bama israelitarrü tücañe, tonema tacana nirranaca na suese. Arrüma perteneceboma ümoti Tuparrü. Sane ito caüma bama aütorrrüma, bama

israelitarrü perteneceboma ito ümoti. Arrtü samamecana ümoti nirranaca suese, samamecana ito enterurrü nipiarrü ümoti. ¹⁷Arrübama israelitarrü tacana taman suese olivo urria. Abe nipiarrü bucarübo y ingertabo piquiataca obitobo apüqui quiatarrü suese olivo, arrüna champürrtü urria nurria. O sea, aboma bama israelitarrü penecoma pünanaquiti Tuparrü itopiqui chicocoromatipü Jesús. Tapü arraña tücañe chapisuputacatipü Tüparrü, pero caüma torrio aume ñacunucüancacarri tacana ümo bama israelitarrü.

¹⁸Pero tapü ñentonaunrrü año caüma y tapü amucanaño: “Arrüsomü manrrü urria somü pünanaqui bama israelitarrü”. Apaquionsaño, urria nabaca auqui nacarrüma bama israelitarrü, champürrtü aboi urria nacarrüma. Suraboira tatito arrüna machepecatarrü: Arrüba nipia manu suese olivo bosüborico ui nirranacarri, champürrtü bosüborico oboirrapatoe. ¹⁹Repente amucanaño caüma sane: “Abu bucarübo arrüba nipiarrü, nauqui ane camporri suiñemo. Canapae manrrü buenorri somü”. ²⁰Sanen te, arrüma penecoma pünanaquiti Tuparrü itopiqui chicocoromatipü Jesús. Tapü arraña iyebo aboi esati, itopiqui apicococati. Tapü vanurri año. Mejor apitaquisünüancasaño aübu naupirru. ²¹Ta arri Tuparrü bacheboti carrticurrü ümo bama israelitarrü, abu arrüma propiorri nipia manu suese olivo. Arri puerurtito acheti carrticurrü aume, bama chütüpü israelitarrü, ta arraña tacana manio niyupaca apüqui quiatarrü suese. ²²Ui arrüna sane amarrtai nibuenucurri Tuparrü. Amarrtaito que arri ipiacati acheti carrtiurü. Bacheboti carrticurrü ümo bama chümacoconauunrrüpü. Buenurri abaübu, arrtü seguibo año amoncatü ümo nibuenucurri. Arttü champü, rrepente aupeneca ito pünanaquiti Tuparrü, tacana manio propiorri nipia manu suese olivo. ²³Tapü arrübama israelitarrü, arttü macoconauunrrüma ñana, tiene que aye uimia tatito esati Tuparrü, o sea ingertaboma tatito apü manu suese uiti Tuparrü. Arri te ane nüriacarri na aisamunenti sane. ²⁴Arraño tacana nipia taman suese olivo champürrtü urria nurria; omeno apü manu taman suese urria, abu chümopü. Manrrü caüma puerurri Tuparrü aiñanti tato arrüba propiorri nipiarrü apü suese, arrüna auquiche tücañe bucarübo.

Taesüburuma ñana namanaiña bama israelitarrü

²⁵Bueno bama masaruquitaquí, irranca na atusi aume arrüna ñapensacarri Tuparrü icütüpü arrüna, sane nauqui tapü ñentonaunrrü año. Aboma bama israelitarrü caüma chirranrrüpüma aye uimia arrüna nurarri Tuparrü. Sane nacarrüma uiti Tuparrü, cheperri tüñatai nubiqui bama chütüpü israelitarrü, bama icocoromati Jesús. ²⁶Auqui caüma namanaiña bama israelitarrü tiene que ataesübuma eanaqui nomünantü. Itopiqui ane corobo sane:

Auqui Sión (Jerusalén) cuati ñana naqui uiche utaesübuca.

Uiti caüma carübo nanaiña nomünantü eanaqui bama israelitarrü.

²⁷Tone arrüna niyesa tratorri aübuma, nanti Tuparrü, irrimiacata tato arrüba nomünantü uimia.

²⁸Arrübama israelitarrü enemigorrüma ümoti Tuparrü caüma, itopiqui chicocotapüma arrüna manitacarrü icütüpüti Jesús. Pero uirri ññatai aume arrüna manitacarrü. Arrübama israelitarrü cuasürümainqui ümoti Tuparrü, itopiqui tacümanauncunuma uiti bama antiburrü yaïtorrüma. ²⁹Arrüba ññacumanatarrti ümoma chücarübopü tato uiti. Tasuruma uiti, chüpuerurrüpü nauqui chüvaleoquipü nurarrti. ³⁰Arraño tücañe chapacoconauncapü ümoti. Pero caüma autaqisürücatai ümoti, itopiqui arrübama israelitarrü chümacoconaunrrüpüma ümoti. ³¹Sane niyücürü caüma. Pero ñana taquisürüma ito ümoti isitai tacana arraño caüma. ³²Sane itusiancatati, que namanaiña macrirrtianuca icu na cürü chümacoconaunrrüpüma ümoti, sane nauqui atusi ito nipucürurrti itacu namanaiña.

Uiñanaunnati Tuparrü

³³¡Coñorrtaiti naqui Bae Tuparrü! Champü tacanache ñapanauuncurrti. Nanaiña tusio ümoti. Chüpuerurrüpü aye osoi ñapensacarrti y arrüna yachücoiti. ³⁴Tacana arrüna nantü icu Nicororrü:

¿Quitipü nauqi puerurrü atusi ümoti ñapensacarrti Tuparrü?

¿Quitipü nauqi ipiaca aicuantomoconotiti?

³⁵¿Isanempü arrüna puerurrü uitorrimia ümoti, nauquipü apacati oemo itobo?

³⁶Itopiqui nanaiña arrüba abe icu na cürü omirriante uiti. Uiti te nubacarrü, y ümoti yupaserebiquirri. Uiñanaunati ümo para siempre.

Nubaserebiqui ümoti Tuparrü

12 ¹Masaruquitaquí, tarucu nipucürurrti Tuparrü utacu. Sane nauquiche sucanañü aume arrüna sane: Apitorrimiasaño ümoti aübu nanaiña naucütüpü. Tone caüma napacumanata ümoti, arrüna urria ümoti. Yasutiuti. Sane caüma urria napeaserebiqui ümoti. ²Tapü apaviviquia isiu nesarrüma costumbrerrü bama macrirrtianuca icu na cürü. Tari chebo aboi nauqui campiabo nausüboriqui uiti Tuparrü ui arrüna niquiampiaca napapensaca. Auqui caüma tusio aume nirrancarrti Tuparrü. Sane ito tusio aume arrüna urria ümoti, y arrüna coñorrtai, y arrüna uiche pucünüñati.

³Artri Tuparrü, ui nibuenucurrti ññemo, itasurutiñü, nauqui apóstol ññü. Sane nauquiche suraboira nurria ausucarü arrüna sane: Tapü anati abarripecu naqui mapensara que tarucapae niüriacarrti y ñapanauuncurrti. Apapensa nurria autacuapatoe, cadati taman, isiu arrüna arrtü torrio aume uiti Tuparrü nauqui apicocoroti nurria Jesús. ⁴Apapensa baeta ümo nocütüpü. Abe sürümana parterrü nocütüpü. Cada taman parterrü ane yaserebiquirri. Pero enterurrü nocütüpü ane tacana tamantai nacarrü. ⁵Sane ito arroñü. Sürümana oñü, pero uiti Cristo usaca tacana tamantai. Cadati taman baserebioti ümoti quiatarrü, y bayurati ümoti.

⁶Torrio uiti Tuparrü ipiacaboti cadati taman ui nibuenucurrti oemo. Pero chichepepü naca nuijiaca. Torrio uiti oemo isiu nirrancarrti. Sane

nauquiche tiene que batrabaca nurria ui arrüna nuipiaca torrio oemo. Supiarrtü anati naqui ipiacati uraboiti arrüna nomirria uiti Espiritu Santo. Tari uraboirati nurria. Tapü urapoiti ñapensacarrtiatoe, sino arrüna torrio ümoti. ⁷Artri naqui ipiaca aserebiti ümo bama maquiataca, tari yaserebirati nurria. Artri naqui ipiaca anunecati, tari ñanunecanati nurria. ⁸Artri naqui ipiaca acunsomocoti, tari ñacuasomoconati. Artri naqui macumanati nenarrirrti ümo maquiataca, tari ñacumananati aübu nanaiña nausasürtri. Artri naqui ane nüriacartri abarrüpecu, tari üriaburati nurria, tapü marriquiatartri. Artri naqui bayurarati ümo bama taquisürü, tari yayurarati ümoma aübu nipucünuncurtri.

⁹Tari ñëmanauncurratoe aucuasürüca aumeampatoe. Tari ünantü aume nanaiña arrüna churriampü. Apasusiu nantarrai arrüna urria. ¹⁰Tari ane napapanauncu aumeampatoe, tacanarrtü ñëmanauncurratoe aubaruquiapatoe, aübu naucua aumeampatoe. ¹¹Tapü apatrabacaca aübu namemarriquiata. Apaserebi ümoti Señor aübu narucürü aume. ¹²Aupucünü itacu na tusio aume que iyebo ñana aboi esati Tuparrü. Tapü apatachea ui nautaqisürücü. Tapü apiñocota napeanca. ¹³Artrtü amasacati naqui icocorotitito Jesús, naqui champü isane ümoti, apayura ümoti, apasapasartri, apasusiusurtri au naupo.

¹⁴Apicunusüancasama bama uiche autaqisürüca, tapü apipiaurramacama. ¹⁵Aupucünü ichepe bama pucünüña. Ausuche ichepe bama suchebo. ¹⁶Apatrabaca chépe año, aübu tamantai napapensaca. Tapü ane nauvanucu. Aucirrtianu aübu bama champü nüriacarrüma, y arrübama champü nane ümoma, tapü ñentonaunrrü año.

¹⁷Tapü apatococa apache tato itobo arrüna churriampü isamutema aume. Apisamuse arrüna urria ümo namanaiña macirrtianuca. ¹⁸Apiña nurria, nauqui urria napaquionco aübu namanaiña, nauqui urria nausüboriqui aübu nanaiña bama ausüborisapa. ¹⁹Tapü apatococa tato ümoti quiatartri, arrtü ane nipünatenti aupu. Mejor apiñoco mecuti Tuparrü, tari uiti asaraiti, itopiqui sane nantü icu Nicororri: “Sobi yache carrticurri, nanti Señor”.

²⁰Apisamuse isiu arrüna ane corobo sane: “Artrtü cürüpioti aesa enemigorri, asapasartri. Artrtü tosioti, aichamasartri”. Sane caüma cüsoboti ui arrüna churriampü isamutenti aemo. ²¹Tapü apichücaño ñome ba chomirriampü, ta apisamuse arrüna urria, nauqui atacüru arrüna churriampü.

Numacoconauncu ümo bama mayüriabuca

13 ¹Namanaiña arraña, masaruquitaqui, tiene que apacoconaun ümo bama mayüriabuca, itopiqui nanaiña nüriacarrü icu na cürri torrio uiti Tuparrü. ²Sane nauquiche artri naqui chümacoconaunrrüpü ümoti yüriaburri cuatü ümoti carrticurri, itopiqui chümacoconaunrrtipü ümoti naqui urüabucati ui yacüpucurtri Tuparrü. ³Artri naqui isamute arrüna urria, champü itopiquiche airruti ñüñana bama mayüriabuca. Pero arrübama malorri, tonema bama ane itopiquiche airruma. Artrtü aurrianca na urria nausüboriqui y champü

naupirruca, apisamuse arrüna urria. Auqui caüma urria ñaquioncorrüma bama mayüriabuca aume. ⁴Itopiqui arrüma ane nüriacarrüma uiti Tuparrü, nauqui urria nabaca. Bayurarama aume apisamune arrüna urria. Pero arrtü apisamute arrüna nomünantü, auqui caüma ane itopiquiche aupirru, itopiqui arrüma ane ñemanauncurratoe nüriacarrüma uiti Tuparrü, nauqui achema carrticurrü. ⁵Sane nauquiche apacoconaun ümo bama mayüriabuca, tapü carrticabo año, y itopiquito tusiatái aume au nautusi, que urria napacoconauncu sane. ⁶Ui arrüna ito apapaca impuestorrü. Tusio que ta arrübama mayüriabuca aboma baserebioma ümoti Tuparrü, itopiqui tone nesarrüma trabacorrü. ⁷Sane nauquiche apitorrimia ümoma nanaiña arrüna tocabo ümoma. Apapaca impuestorrü. Tari ane napanauca ümoti naqui ane nüriacarrü.

Nosüboriqui urria

⁸Apapaca nabebequi. Aucuasürü aumeampatoe. Arrtü cuasürüma aume bama maquiataca, apisamute isiu yacüpucurrü Tuparrü, chauqui tücocono aboi nanaiña nüriacarrü. ⁹Apisuputaquio arrüba bacüpucuca: Tapü aecatü isiu quiatarrü paürrü. Tapü atabaiquia. Tapü acusüpüca. Tapü arrianca ümo nenarrirrti quiatarrü, y nanaiña ba piquiataca bacüpucuca. Nanaiña arrüba apicocoquio, arrtü cuasürüti aume naqui ausüborisapa tacana naucua aumeantoe. ¹⁰Arrtü cuasürüti oemo osüborisapa, tiene que urria nubachücoi aübuti. Arrtü uisamute arrüna sane, uicocota nanaiña arrüna corobo nüriacarrü, itopiqui arrüna nicuarrrü quiatarrü oemo.

¹¹Apisamuse te sane, itopiqui tusio aume causane arrüna tiemporrü caüma. Tücañe numo baviviquia eana nomünantü usaca tacana manuca. Pero caüma tiene que orrtopü, itopiqui chauqui tüsaimia niyequirrti tato Jesús, anche aye osoi au napese, ta tücoboí uicococati. ¹²Chauqui tücoboí arrüna tomiquianene nesa nomünantü, y tirranrrü ito anene. Sane nauquiche tiene que uñoco arrüba nomünantü, y tiene que basuriu ucüsübu uiti Tüparrrü, nauqui atacüro osoi nomünantü. ¹³Uicoñocona nurria nosüboriqui, nauqui puerurrü namanaiña asarama oñü, tacana au sapese, champürrtü tacana au tobirri nesa nomünantü. Tapü apasamuca pierrtaca aübu norisübacarrü y nomünantü, y aübu napaviviqui tacana numuquianca. Tapü aburatoquiquia. Tapü pesabatai aume nanaiña arrüna amarrrtai. ¹⁴Apanqui pünanaquiti Señor Jesucristo na ayurati aume, nauqui urria nausüboriqui. Tapü apapensaca apisamune isiu arrüna naurrianca ñoma ba chomirriampü.

Nosüboriqui ichepeti osüborisapa

14 ¹Apasusiusurrü naqui chipiacapü nurria aicocorotiti Jesús. Tapü aburatoquiquia ümoti, arrtü ane quiatarrü ñapensacarrü. ²Aboma bama urriantái ümoma aama aruqui nanaiñantái pemacarrü. Pero aboma ito maquiataca birrubuma aama nañese, ñaquioncorrüma ane nomünantü uimia arrtü basoma. Chipiacapüma nurria. ³Arrübama basoma nanaiña,

tapü unumati naqui chübasopü nañese. Y arrüba chübasopüma nañese, tapü quirrtoboma ñünana bama maquiataca, itopiqui arrti Tuparrü urria narrtarri ümoma. ⁴¿Causanempü aurrian apacurrti aübuti naqui chütüpü amoso? Arrüma baserebioma ümoti Tuparrü, champürrtü aume. Arrtiatai puerurrü uraboiti arrtü urria yachücoiti imostorrti, o champü. Pero tusio oemo que urria yachücoimia, itopiqui arrti Señor bayurarati ümoma.

⁵Aboma bama namatü que abe arrüba naneneca musamamecana ümoti Tuparrü. Aboma ito bama maquiataca namatü chepatai ümoti nanaiña naneneca. Tari ane ñapensacarrtiatoe cadati taman ümo arrüna sane.

⁶Artri naqui iñanauniontiño manio naneneca musamamecana, isamutenti sane ui ñanauncurrti ümoti Tuparrü. Artri naqui baso nañese isamutentito sane ui ñanauncurrti ümoti Tuparrü, ta machampienacanati ümoti itobo pemacarrü. Sane ito artri naqui chübasopü nañese, isamutenti sane aübu ñanauncurrti y aübu ñachampienacarrti ümoti Tuparrü.

⁷Champüti naqui oñeanaqui süboricoti ümotiatoe. Chüpuerurrüpitonauqui ocon isiu nurriancatoe. ⁸Itopiqui arrtü usaca icu na cürrü, osüboriquia ümoti Señor. Arrtü oconca usacaiqui mecuti. Así que tusio oemo caüma osüboriquia uiti Cristo auna icu na cürrü y au noconco ito ñana pertenecebo oñü ümoti. ⁹Itopiqui artri Cristo coiñoti y süboricoti tato. Sane nauquiche ane nüriacarrti ümo bama süborico y ümo bama ito coiño.

¹⁰¿Causanempü nauqui puerurrü apuncati aubarui? ¿Acaso chütusiopü aume, tiene que batürai ñana esati Tuparrü na acurrtati usaübu? ¹¹Ta sane ane corobo:

Arrüñü isüboriquia, nanti Señor, y namanaiña bachesoiyoma yesañü ñana y namanaiña tiene que aiñanaunumati Tuparrü.

¹²Cadati taman tiene que urabotiyü esati Bae Tuparrü nanaiña arrüba isamutenti icu na cürrü.

Tapü uiñacati usaruqui au nomünantü

¹³Sane nauquiche tapü apuncatiqui quiatarrrü. Tapü apanitaca churriampü ümoti. Amasasai nurria, tapü apisamute arrüna uiche ane macocotorrrü ümoti aubarui; rrepente iñocotati ñacoconauncurrti ümoti Jesús. ¹⁴Arrüñü tusio nurria iñemo uiti Señor Jesús, que nanaiña urria umane. Pero aboma bama ñaquiioncorrüma ane comirarrü arrüna uiche ane nomünantü uimia. Arrüma mejor tapü basoma manu comirarrü.

¹⁵Supiarrrtü arrücü aaca pemacarrü isucarüti naqui ünantü ümoti manu pemacarrü. Ui arrüna sane nachücoi sucheboti, canapae chücuasürütipü aemo. Ta itopiquitito coiñoti Cristo. Sane nauquiche asai nurria, tapü auqui naca tacürusu ñaquiioncorrti ümoti Tuparrü. ¹⁶Sane nauqui tapü manitanama churriampü ümo arrüna nachücoi, abu aemo urriantai. ¹⁷Usaca iquiana nüriacarrti Tuparrü. Tapü tarucapae numapensaca iyo arrüna uñutuburibo y iyo arrüna uchabatabo. Manrrü urria ümoti Tuparrü arrtü chebatai osoi na ayurati Espíritu Santo oemo, nauqui uisamune arrüna urria y nauqui urria nusaca, y nauqui upucünu uiti. Sane

nosüboriqui ui nüriacarriti Tuparrü oemo. ¹⁸Arrtü sane napaserebiqui ümoti Cristo, pucünüñati Tuparrü aucuata, y pucünüñama ito aucuata bama macrirrtianuca.

¹⁹Sane nauquiche tiene que bapache nuquiubu oñü aübu narucurrü oemo, causane nauqui urria nosüboriqui aübuti osüborisapa, y causane nauquito ane manrrü numapanauncu y numacoconauncu ümoti Cristo.

²⁰Tapü apiñamesocota yatrabacacarriti Tuparrü, itopiqui arrüna aumate. Ñemanauntu champü causane ui comirarrü. Pero churriampü arrtü ubaca y uirri isamutenti quiatarrü nomünantü. ²¹Sane nauquiche manrrü urria arrtü chumatempü nañese y chuchacapü vinorrü isucarüma, nauqui tapü ane isane osoi arrüna uiche uiña macocotorrü ümoti usaruqui.

²²Urriantai arrtü cadati taman ane ñapensacarriti ñome arrüba sane, pero champü nümoche aburaboi tanu. Arrti te Tuparrü tusiatai ümoti. Urria nabaca, arrtü puerurrü apisamune isiu napapensaca, y tusio aume champü nomünantü uirri. ²³Pero arrti naqui basoti y au nitusirrti mapensarati que uirri ane nomünantü uiti, tonenti naqui ñemanauncurratoe ane nipünatenti. Itopiqui nanaiña arrüna uisamute aübu chomirriampü numapensaca, tone nomünantü.

15 ¹Arrübama abarrüpecuqui ipiacama nurria aicocoromati Jesús tiene que apasamunca aübu bama chipiacapü nurria. Tapü apapensaca aumeantai. ²Uisamunena arrüna urria ümoti osüborisapa, ipucünuncubuti, sane nauqui manrrü urria ñapanauncurriti.

³Sane ito tücañe uiti Cristo. Champürrtü süboricoti ümotiatoe. Ta sane ane corobo nurarriti: “Arrübama macrirrtianuca unumati Tuparrü, abu iñemo ito manu nuncurrüma”. ⁴Nanaiña arrüna ane corobo tücañe, corobo te oemo, nauqui atusi oemo. Uirri masamuca tairri ñome ba taquisürücüca, y manrrü arucu oemo nubarrüperaca ümo manu nanenese anche aye osoi au napese. ⁵Uiti te Tuparrü chübatachecapü, uitito arucu nurria oemo. Rranquiquia pünanaquiti autacu, nauqui ayurati aume, nauqui chepatai napapensaca, sane caüma aye aboi tacana nisüboriquirrti Jesucristo tücañe. ⁶Auqui caüma puerurrü nanaiña año juntorrü apiñanaunti Bae Tuparrü, naqui Yaitoti Señor Jesucristo.

Namanaiña iñanaunumati Tuparrü

⁷Apasusiususaño aumeampatoe tacanatito Cristo yasuriuruti año, bama israelitarrü y bama chütüpüma. Uirri caüma iñanaunumati Tuparrü macrirrtianuca. ⁸Apaquionsaño iyo arrüna sane: Arrti Cristo cuatati tücañe na aserebiti ümo bama israelitarrü. Uirri tusio oemo nibuenucurrti Tuparrü, itopiqui uirri tücocono arrümanu nurarriti tücañe ümo bama antiburrü yaütorrüma. ⁹Caüma arrübama ito chütüpü israelitarrü machampiencanama ümoti Tuparrü itobo arrüna nipucürurrti itacuma. Sane nantü icu Nicororrü:

Itopiqui arrüna sane iñanauncü ichepe bama chütüpü israelitarrü.

Irranca rracanta ito aemo, Tuparrü, ichepema.

¹⁰Nantito icu Nicororrü sane:

Arraño bama auqui ba piquiatata nacioneca, aupucünü aübu bama nesarriti genterrü Tuparrü, bama israelitarrü.

¹¹ Nantiti icu Nicororrü sane:

Arrübama auqui piquiatata nacioneca iñanaunumati Tuparrü ñana, namanaiña machampiencanama ümoti.

¹² Y arrti profetarrü Isafas maconomonoti sane:

Artri maniqui tamanti eanaqui nesarriti familiarrü Isaf, naqui Cristo, tiene que asuriuruti üriacaboti ümo nanaiña nacioneca.

Arrübama macrirrtianuca oncomatü nurria ümoti.

¹³ Uiti Tuparrü urria numaquionco ümo arrüna urria cuabotiqui oemo. Tari yacherati aume aupucünuncubu, y nauquito urria nabaca uiti, itopiqui na apicococati. Sane caüma ui nicusüurrti Espiritu Santo manrrü urria napaquionco ümo arrüna urria cuabotiqui aume, aübu naupucünuncu.

Yatrabacacarrti Pablo

¹⁴ Masaruquitaiqui, arrüñü tusio nurria iñemo ta arraño bien buenurraño. Ane napapanauncu. Apipiaca apanuneca aumeampatoe. ¹⁵ Raconomoca arrüna quichonimiacarrü aume aübu narucurrü iñemo y fuerte nisura aume. Isamute sane nauqui tapü tacürusu napaquionco iyo arrüna chauqui tütusio aume. Ane nisüriaca, itopiqui torrio iñemo arrüna trabacorrü uiti Tuparrü. ¹⁶ Artri itasurutüñü, nauqui suraboi nürirrti Jesucristo isucarü bama chütüpü israelitarrü. Yaserebiquia ümoti Tuparrü tacanati taman sacerdoterrü, naqui itorrimiatati macumanataca ümoti Tuparrü. Surapoi arrüna urria manitacarrü isucarü bama chütüpü israelitarrü, nauqui aboma tacana macumanatarrü ümoti Tuparrü. Urria nisüboriquirrimia uiti Espiritu Santo, sane nauquiche urriama au narrtarrrti Tuparrü.

¹⁷ Ipuçünuncatai icuata arrüna niyaserebiqui ümoti Tuparrü, itopiqui icococati Jesucristo. ¹⁸ Chirrancapü suraboi arrüna urriante sobiatoe, cunauntaña arrüna isamutenti Cristo saübuñü. Aboma macrirrtianuca auqui nanaiña nacioneca chauqui tümacoconaunrrüma ümoti Tuparrü ui arrüna nisura y ui arrüna isamute, ¹⁹ y ui arrüba yarusürürrü señarrü y milagrorrü omirriante, y ui nicusüurrti Espiritu Santo. Sane nauquiche surapoi arrüna urriampae manitacarrü au nanaiñantai, auqui Jerusalén hasta manu ciürü Ilírico, taha saimia nauci.

²⁰ Isiu nirratrabacaca ane nirranca nantarrai yerotü auna cauta chütusiopü nürirrti Cristo, itopiqui chirrancapü seguiboñü aübu yatrabacacarrti quiatarrrü.

²¹ Rratrabacaca isiu manu nurarrrti profetarrü tücañe, nantü sane icu Nicororrü:

Arrübama champürtrü toncoimia arrüna manitacarrü, tiene que onsaperioma, y tiene que aye uimia.

Artri Pablo rranrrti aürotitü au Roma

²² Itopiqui arrüna nirratrabacaca chiüpuerürrüpü yero tanu yapasearaño au Roma. ²³⁻²⁴ Pero caüma tacürusu niyesa trabacorrü au ba cüca auna. Irranca

caüma yerotü au España. Au arrüna niyesa viajerrü taha irranca yapasearaño au Roma, itopiqui tücoboï niranca yasaraño. Irranca te yaca auchepe ñome mantucubatai naneneca, nauqui upucünu usaübumantoe. Auqui caüma puerurrü apayura ñemo ümo niyesa viajerrü manrrü tahiqui au España.

²⁵Pero primero caüma yecatü au Jerusalén itorrimia macumanatarrü ümo bama icocoromati Jesús taha, ²⁶ui bama masaruquитайqui au manio cüca Macedonia y Grecia. Arrüma ichépatai ñapensacarrüma acumanama ümo bama usaruquитайqui au Jerusalén, bama poberrü. ²⁷Isamutema arrüna sane aübu nipucünuncurrüma. Urriantai te sane, itopiqui arrüma ebeoma ümo bama au Jerusalén. ¿Causane nauquiche ebema ümoma? Itopiqui ui bama au Jerusalén ññatai arrüna macunüsüancacarrü hasta Macedonia y Grecia. Sane nauquiche urriantai ümoma ayurama tato ümoma itobo aübu nenarrirrimia. ²⁸Arrtü tütacürusu sobi arrüna trabacorrü, y nanaiña torrio nurria ümoma au Jerusalén, auqui caüma yecatü au España, y yapaseacaño ito tanu auqui nipiasaca. ²⁹Tusio te ñemo, arrtü ññatai aubesa, cuatito sobi tarucu ñacunüsüancacarrü Cristo aume.

³⁰Masaruquитайqui, tusio ñemo isuasürüca aume uiti Espíritu Santo. Sane nauquiche rranquiquia amopünanaqui au nürirrti Señor Jesucristo sane: Apean ichacüñü, y itacu arrüna nirratabacaca. ³¹Apanqui pünanaquiti Tuparrü, na aitaesümunutiñü ñünana bama israelitarrü, bama chicocoromatipü Jesús. Apanquisio pünanaquiti, nauqui urria ñaquioncorrüma taha ñemo bama icocoromati, nauqui asuriuma arrüna macumanatarrü. ³²Auqui caüma ññatai tanu aübu nipucünuncu, yasaraño, y ñacansa ito aubesa, arrtü sane nirrancarrü Tuparrü.

³³Taiquiana urria nabaca uiti Bae Tuparrü. Amén.

Ñaquioncorrü Pablo ümoma

16 ¹Arrüna noquiasi Febe conto süro tanu apasearaño. Tone ananca baserebio ümo bama icocoromati Jesús au manu pueblurrü Cencrea. ²Apasusiu nurria au nürirrti Señor, tacana nantarrtai uisamute uyarrüpecu bama uicococati Jesús. Apayurase aübu nanaiña nirrantiümo, itopiqui tone bayurara ümo bama sürümanama. Bayurara ito ñemo.

³Nirraquionco tano ümoti Aquila y ümo Priscila, nicüpostoti. Tonema bama nisumpaño tücañe au niyaserebiqui ümoti Jesucristo. ⁴Arrüma tüsaipü acoma auqui niyaca. Sane caüma ñachampienca ümoma, y namanaiña bama icocoromati Jesús, bama chütüpü israelitarrü machampiencañama ito ümoma. ⁵Aburasoi ito nirraquionco ümo bama ññanaunumati Tuparrü au niporrti Aquila. Nirraquionco ümoti Epeneto, naqui primero aicocorotiti Jesús au manu provinciarrü Asia. ⁶Nirraquionco ümo Mariarrü, arrüna tarucapae yatabacacarrü aume tücañe. ⁷Nirraquionco ümoti Andrónico y ümoti Junias. Arrüma israelitarrüma tacanañü. Amoncoma au preso ichepeñü. Arrüma urriampae yaserebiquirrimia tacana apostolerrü. Icocoromati Cristo primero rropünanaquini.

⁸Nirraquionco ñumoti Amplias, naqui cuasürüti ñemo, itopiqiu icocorotiti Señor. ⁹Nirraquionco ñumoti Urbano naqui isumpañoero au trabacorrü ñumoti Jesucristo. Nirraquionco ito ñumoti Estaquis, naqui cuasürüti ñemo. ¹⁰Nirraquionco ñumoti Apeles. Tusio nurria que arrti oncotitü nurria ñumoti Cristo. Nirraquionco ito ñumo bama au nesarrti familiarrü Aristóbulo. ¹¹Nirraquionco ñumoti Herodión, naqui israelitarrü, y ñumo bama masaruquitaquí au niporrti Narciso, bama icocoromati Señor. ¹²Nirraquionco ñumo Trifena y ñumo Trifosa. Arrio paserebio ñumoti Señor. Nirraquionco ito ñumo Pérsida, arrüna cuasürüti ñemo. Tarucu yatrabacacarrü ñumoti Señor. ¹³Nirraquionco ñumoti Rufo, naqui urriampae ñacoconauncurrü ñumoti Señor. Nirraquionco ito ñumo nipiactütöti. Tone ananca tacana arrüna propoirrü nipiactü. ¹⁴Nirraquionco ñumoti Asíncrito, ñumoti Flegonte, ñumoti Hermas, ñumoti Patrobas, ñumoti Hermes, y ñumo namanaiña masaruquitaquí, bama aboma ichepema. ¹⁵Nirraquionco ñumoti Filólogo y ñumo Julia, y ñumoti Nereo y ñumo niquiastoti, y ñumoti Olimpás, y ñumo namanaiña bama masaruquitaquí aboma ichepema, bama icocoromati Tuparrü. ¹⁶Apanqui nurria aumeampatoe aübu napatañumequí. Namanaiña bama icocoromati Jesús ñaquioncorrüma tanu aume.

Ñacuansomococorrüti Pablo

¹⁷Amasasai nurria ñünana bama uiche chichepequipü napapensaca, bama uiche mamensö napacoconauncu ñumoti Cristo. Arrüma chümanunecanapüma isiu arrüna amoncoi auqui maübo. Apaquicho esaquimia, tapü abasiquia ichepema. ¹⁸Arrüma chübaserebiopüma ñumoti Señor Jesucristo, ta ñumomantoe. Isamutema isiu nirrancarrümantoe. Ui na coñorrtai ñanitacarrüma matachemacanama ñumo bama chütusiopü ñumoma.

¹⁹Pero arrüna napacoconauncu ñumoti Tuparrü tusio ñumo namanaiña macirrtianuca. Ipucünuncatai aucuata. Caüma irranca nauquí apipia apisamune arrüna urria, y tapü apipiacaquí apisamune arrüna nomünantü. ²⁰Uiti Tuparrü urria nabaca. Uitito contoatai aitañacanatiti acü naqui choborese iquiana naupope. Tari icunusüancanati año naqui Señor Jesucristo. ²¹Ñaquioncorrti Timoteo tanu aume. Tonenti naqui isumpañoero au trabacorrü. Ñaquioncorrtito tanu aume Lucio y arrtito Jasón y arrtito Sosípater, bama israelitarrü tacanañü.

²²Arrüñü Tercio iaconomota arrüna nesarrti carta Pablo. Nirraquionco tanu aume au nürirrti Señor.

²³Ñaquioncorrti Gayo aume. Arrüñü Pablo yaca alojaboñü au niporrti. Auna niporrti iyoberabaramacü nantarrtai bama icocoromati Jesús. Ñaquioncorrüma tanu aume. Anatito auna Erasto, naqui tesorerrorrü au na pueblurrü, y arrti Cuarto. Ñaquioncorrüma tanu aume.

²⁴Tari icunusüancanati año naqui Señor Jesucristo. Amén.

Manauncurrü ümoti Tuparrü

²⁵Machampiencana ümoti Tuparrü. Arrti te puerurrü ayurati aume, nauqui urria napacoconauncu ümoti, ui arrüna apicocota na urriampae manitacarrü icütüpüti Jesucristo, arrüna surapoi. Ñemanauntu nurria arrüna manitacarrü. Tücañe chütusiopü, ananca anecanatai. ²⁶Pero caüma tusio. Arrübama profetarrü turapoiñacaü pario tücañe. Arrti Tuparrü, nauqui chüpuerurrüpü aconti, bacüpuruti nauqui usuraboi na manitacarrü isucarü nanaiña nacioneca, sane nauqui namanaiña aicocoma.

²⁷Arrti Tuparrü tonentiatai ane ñemanauncurratoe ñapanauncurrti. Usuputacati uiti Jesucristo. Tapü tacürusu numanauncu ümoti. Amén.